

DIKETSAHALO DI

HLAKISWA KE SEPOROFETO

 Ha re inamiseng dihloho tsa rona jwale bakeng sa thapelo.
 Morena Modimo wa rona, Mmopi e moholo wa Mahodimo le lefatsho, Ya tsositseng hape Jesu bafung, mme a phela le rona dilemong tsena tse dikete tse pedi, ho phela kamehla ho tiisa Lentswe la Hae le ho Le etsa nnete molokong o mong le o mong. Re leboha Boteng ba Hae bo Kgethileng hona jwale, ho tseba sena, hore re na le tiisetso e kholo ena, hore ka mora hoba bophelo bona bo fete, re na le Bophelo bo sa Feleng lefatsheng le tlang. Re O leboha, ka sena, Morena. Le ka tshepo eo, tshetledi ya moya, e tiileng le ya nnete nakong ya sefefo. Me ha difefo di tla, maqhubu a maholo a thethetha, re utlwa hore ka tumelo ho Yena re ka sesisa hodima leqhubu le leng le leng.

² Modimo, re thuse bosiusng bona ha re tla ho sebeletsa bakudi le ba hlokang. Re a rapela, Modimo, hore ho se be le motho ya kulang hara rona ha re tloha bosiusng bona. Motho e mong le e mong a ke a fodiswe ke Matla a Hao a Kgetheh ileng, mona le naheng ka bophara, kgokahanong, ho se be le motho ya fokolang ya tswang mohahong ofe feela kapa phuthehong efe feela bosiusng bona. Moya wa Hao o ke o ba fodise. Letsatsi le leholo la ho loka, le nang le phodiso mapheong a Lona, le chabe, le romele mahlasedi a tumelo pelong e nngwe le e nngwe ba sa mametse Lentswe, ba bone diponahatso tsa Moya o Halalelang ho ba kgodisa hore O ntse a phela. Re rapella mahlohonolo ana, Ntate, ka Lebitso la Jesu. Amen.

Le ka dula fatshe.

³ Ruri re hloma ona e le monyetla o moholo ho ba mona bosiusng bona, hape, ho—ho bua le batho le ho rapella bakudi. Re batla ho dumedisa bohole ba kantle naheng ya—ya dikgokano tsa fonofono na ha ka bophara, hape bosiusng bona. Mme kahoo re rapela hore Modimo a hlohonolofatse e mong le e mong wa lona, re tshepa hore bohole ba amohetseng Kreste hoseng hona ba tla tlatswa ka Moya o Halalelang mme ba phele kamehla ka tumelo le ka botshepehi ho Yena ho fihlela bophelo bo fetile mona lefatsheng, bophelo bona bo shwang. Mme bona, ka ho etsa hoo, ba be le Bophelo bo sa Feleng. Ba ke ke ba shwa mongwaheng o tlang, ho Mongwaha o moholo oo bohole re o lebeletseng.

⁴ Jwale re tla re, ke sa ntse ke e nahanne, e seng ho sitisa. Moena Vayle o teng mona, mme nka nna ka se khone ho

mmona. Ke tla...Na nka o romella buka eo ha ke kgutlela Tucson? Ke ntse ke e sheba, ha ke eso e bale kaofela le jwale, mme ke tla o romella yona hang hoba ke fihle Tucson.

⁵ Jwale ke batla ho etsa tsebiso. Haholoholo hona ho lebisitswe dikerekeng hohle, haholoholo Bophirima, kapa kae feela e batlang ho tla. Moena wa rona ya kgabane, Moena Pearry Green, ka...Ke yena monna hlohleletsang kgokahano ena ya fonofono. Morena o ne a kentse pelong ya hae ho tla re etela Tucson, le ho qala tsoselsetso Tucson, eo re e hlokang ruri. Mme Moena Pearry o tla be a le Tucson. Ha le batla ho ikopanya le yena, ikopanyeng le ofisi ya rona mono. E tla be e le Phato wa la 10, 11, 12, le 13. E bile pelong ya hae ka nako e telele, mme ka mmolella hore ho na le "tsela e le nngwe ya ho e tlosa pelong ya hao, eya o e etse." Mme ke moena wa Mokreste, mohlanka wa sebele wa Modimo. Mme lona batho, ba Tucson, kea tseba le tla hlohonolofatswa ha a ntse a rera mono kae-kae, mohlomong Ramada Inn kapa hohle moo Morena a hlahisang sebaka, ha eso se fumane mona. Empa kea tseba le tla hlohonolofatswa ke ho tla, ho utlwa Moena Green ha a re hhalosetsa Lentswe la Modimo, mohlomong ho rapella bakudi, ka hohle ho tshebetsong ya tlotso ya Modimo ho etswa.

⁶ Hape re batla ho leboha Moena Orman Neville, Moena Mann, ka nako e babatsehang ena ya kopano le bona. Kamoo ke leng motlotlo ha ba, ho amana le monna ya kang Moena Neville, Moena Mann, le baruti bana bohle mona. Kea kgolwa ba se ba ananetswe. Ha ho eso etswe, ke lekgotla la rona le ke kereke mona, ke tiile Modimo o le ananela jwalo ka bahlanka ba Hae mona. Morena a ke a le hlohonolofatse kamehla.

⁷ Jwale, ke kopilwe nthwana mona, pampitshaneng eo ke e filweng, ho...Ba bile le kopano ya diteraseti bosiu bo bong mona, lekgotleng la diteraseti le batikone, mme ke nahana metsotso e badilwe hoseng hona ka pela kereke. Etswe, e le moetlo wa rona ho etsa hoo. Dqetong tse entsweng ke lekgotla la diteraseti le batikone mona kerekeng, ehlile, di ke ke tsa thabiso e mong le e mong. Re ke ke ra etsa hoo. Ha ke amane le lekgotla la diteraseti le lekgotla la batikone ka ntho e le nngwe. Le voutu ha ke na yona ntle leha ho na le kgang, mme ke lokela ho ba mona ho e etsa he, Moena Orman Neville o nka kgetho eo ya bobedi. Ebe re lokela ho tekena dintho tsena, hoba re karolo ya kereke. Empa diqeto tseo lekgotla la diteraseti le makhotla ao a di etsang, ehlile re ba tshehetsa ka dipheresente tse lekgolo, hobane ke seo ba leng mona ka sona. Mme diqeto tsa bona di pakeng tsa bona le Modimo. Nke ke, nke ke e bile ke a sitwa, ka mokgwa ofe feela, ho ema kgahlano le qeto eo. Mme ntho e nngwe, ke thibetsoe ke Mmuso wa Dinaha tse Kopaneng ho etsa qeto efe mabapi le seo, kahoo le se nkope ho lokisa diqeto tsa bona. Nke ke ka e etsa, mme ha

ke batle ho utlwa letho ka yona. Le a bona? Kahoo le se nkope ho lokisa diqeto tsa bona. Le bonane le lekgotla, ke lona le entseng diqeto. Ho lokile.

⁸ Jwale mabapi le kopano e tlang, ho ka etsahala, ha Morena a rata, ke tla kgutlela mona divekeng tse ka bang nne kapa ho ya ho tse tsheletseng, kapa ntho e kang eo, mohlomong bakeng sa kopano ya Sontaha se seng. Mme ke tsebisitse hoseng hona ke ne ke batlile ho bua ka *Modimo O Bonahaditswe Lentsweng La Hae*, mme nke ke ba le nako feela bosiung bona, mme, ho bua nnete, ke batla ke se na lenseswe le lekaneng ho e etsa. Mme hape letshwele, ka ntle ho batla ho na le bongata bo lekanang le bo ka hare, mme, mohlomong ho feta, ha o bala dibese le diteraka le dintho tse dutsgeng ka ntle ka batho. Ha e buletswe, kgasonyana e ntlaufetse hanyenyane, re ka e utlwa. Leqhubunyana lena, leqhubu le le kgutshwane ho tswa tabernakeleng, re ka le tshwara bohole ba boloko ba motse. Mme tse ding tsa dikoloi di bohole ba diboloko tse mmalwa, lethathama la dikoloi, hodimo le tlase, le ho pota le hara diterata, ho pota tabernakele bosiu bona. Ha ke dumele nako efe, ha ke bona, re kile ra ba le batho ba bangata ba patisaneng ka hare le ho pota kereke ho feta bao re nang le bona bosiung bona. Kahoo re... Mme bongata, ngata, ngata bo ntse bo kganna bo kena le ho kganna bo tswa.

⁹ Kahoo ho a bontsha, "Moo Setopo se leng teng, dintsu di tla bokana." Mme a nke ke re ho lona bosiung bona, sehlotshwaneng sena sa batho, ke seboka sa matjhabatjhaba. Hantle-ntle ho feta pedi-tharong ya dinaha tsa kopano di emetswe mona, ntle le dinaha tse hlano dissele, esita le Rashiya, le hohle dikarolong tse fapaneng tsa na. Tlase kwana Venezuela, ntle Jamaica, le hohle dikarolong tse fapaneng tsa setjhaba, batho ba teng mona, ba lapile ba nyoretswe Modimo. Ke nako e babatsehang hakakang!

¹⁰ Jwale ke batla, pele ho balwa Bibebe, mme le ke le nthapelle jwale. Ke—ke tla leka ho tlisa Molaetsa o monyenyan, ha Morena a rata, ka tshwanelo ya phodiso ya Kgalalelo. Hoba, hoseng hona re buile ka pholoho. Mme bosiung bona re tla bua metsotso e mmalwa ka phodiso ya Kgalalelo, re ntoo bitsa mola wa thapelo le ho rapella batho. Ha re ntse re etsa hona, ka ntle dikgokanong, hohle moo le leng teng, esita le ka ntle dibeseng le ka makoloing ka thoko, boholeng ba boloko kapa tse pedi ho tloha tabernakeleng; ha ho fihla nako ya ho rapella bakudi, ha le sa kgone ho kena ka mohahong... Etswe, le ke ke, ke tiile jwale, hobane menyako hohle e petetsane ka thata, morao, mme ha ho sebaka kae le kae, kahoo le rapele mme le beane matsoho ka ntle mono. Mme moruti e mong le e mong ya hokeletsweng bosiung bona, le yena a rapelle phutheho ya hae ha ditshebeletso tsa phodiso di tswella. Re dumela hore Modimo ke motlalahohle, ka mahohle. Jwale pele re bala kapa...

¹¹ Pele re—re rapela, re batla ho bala Lentsoe la Modimo. Mme ke fetotse Mangolo a ka—a ka nakwaneng ya ho feta, hobane ke batla ho fetola mofuta wa kopano eo e ke neng ke e ipeetse yona bakeng sa bosiu bona, ka baka leo ke e fetotse hanyenyane; mme ka hoo ka lokela ho fetola Mangolo a ka, e seng ho a fetola, empa ho a hlophisa ka mokgwa o mong, wa phodiso ya Kgalalelo, hore—hore batho ba tle ba utlisise.

Ha re phetleng ho Mohalaledi Luka, kgaolo ya 24. Mme re tla qala temaneng ya 12 ya kgaolo ya 24, mme re bale ho theohela ho ya ho bo 34. Ke tshong ya Morena Jesu.

Leha ho le jwalo Petrose, Petrose a tloha, a mathela lebitleng; eitse hobane a nyarele, mme a bona ho beiwe a...a ntse a maketse ka ho yena ke se hlahileng.

Ka lona letsatsi, ba babedi ba bona ba ne ba ya motsaneng o mong, o bitswang Emmause, bohole ba wona e le distadia tse mashome a tsheletseng.

Jwale, ho nka distadia tse leshome ho etsa—ho etsa maele, ka hoo e ne e ka ba dimaele tse tshelela.

Ba ne ba buisana ka...tseo tsohle tse etsahetseng.

...ba re ba buisana, le ho botsana, Jesu ka sebele a ba atamela, mme a tsamaya le bona.

Empa mahlo a bona a ne a sirelwa ba ba sitwa ho mo tseba.

A re ho bona, le ntse le buisana ka ditaba dife, le ntse le tsamaya, le bile le swabile hakakale?

E mong, lebitso la hae e le Kleopa, a arabela ho re ho yena, Ke wena o lemong hara ba ahileng Jerusalema, ya sa tsebeng taba tsena tse hlahileng...tshiung tsena?

A re ho bona, Dife?

Jwale le hopole, enwa ke Jesu ka Sebele, a tsohile, a bua.

Ba re, Tsa Jesu wa Nazaretha, eo e neng e le monna wa moporofeta ya matla mesebetsing le ka dipolelong tsa hae pela Modimo le pela setjhaba:

...kamoo baprista ba baholo le babusi ba rona ba mo neetseng ho...ho—ho ahlolelwa lefu, ba ba ba mo thakgisa.

Ha e le rona re ne re re tshepile hobane ke yena ya tla lopolla Iseraele: leha ho le jwalo, e se e le letsatsi la boraro taba tseo di hlahile.

Kwana, basadi ba bang ba sehlopha sa rona ba re makaditse haholo, ba ile lebitleng e sa le ka meso;

Mme ha ba ka ba fumana setopo sa hae, ba ba ba tla, ba bolela, hore ba bone mohlolo wa mangeloi, a itseng o a phela.

Ba bang ba rona ba ile lebitleng, mme ba fihletse ho le jwalo kaha basadi ba boletse; empa yena ha ba ka ba mmona.

Mamelang jwale; Jesu.

Yaba o re ho bona, Jo batho ba se nang kutlwisiso, ba pelo tse diehang ho dumela tsohle tse boletseng ke baporofeta:

Hleka e ne e se tshwanelo hore Kreste a utlwiswe bohloko, a ntoo kena kganyeng ya hae na?

Yaba o qala ka Moshe a isa ho baporofeta bohle, a ntse a ba halosetsa wohle, mangolong wohle tseo a boletseng ka tsona.

Ba atamela motsana, oo ba yang ho wona: empa Jesu a etsa joaloka hoja a fetela pele.

Ba mo qophella, ba re, Hlola le rona: hobane e se e le mantsiboya, le letsatsi le se le rapame. A ba a kena a dula le bona.

Eitse, ha a dutse dijong le bona, a nka bohobe, a boka, a bo ngwatha, a ba nea bona.

Yaba mahlo a bona a tutuboloha, mme ba mo tseba; empa a ba nyamella.

Ba ba ba bolellana, ba re, Ana dipelo tsa rona di ne di sa tjhese ka hare ho rona, ha a ntse a bua le rona tseleng, a re halosetsa mangolo na?

Ka yona nako eo ba tloha, ba kgutlela Jerusalema, mme ba fihlela ba leshome le motso o le mong ba phuthehile, le ha bona ba nang le bona,

Ba re, Morena o tsohile bafung ka nnete, o bile o bonwe ke Simone.

Le bona ba pheta tse ba hlahetseng tseleng, le kamoo a itsebisitseng ho bona kateng ka ho ngwatha bohobe.

¹² Jwale ha re rape leng. Ntate ya ratehang ya mosa, re O leboha ka Lentswe la Hao, hoba Lentswe la Hao ke Nnete, Lentswe la Hao ke Bophelo. Mme Wena, Oho Morena, le Lentswe la Hao le Bang. Kahoo rea rapela bosiusing bona, Morena, hore O tle o kene hara rona ka matla a tsoho ya Hao mme o re bontsue bosiusing bona, jwalo ka bao ba tswileng Emmause, le rona re tle re kgutlele malapeng a rona, re re, "Na dipelo tsa rona di ne di sa tjhese ka ho rona?" Fana ka sena, Morena, e se e le ho ella nako ya mantsiboya hape. Hoba re e kopa ka Lebitso la Jesu. Amen.

¹³ Jwale ke batla ho bua ke lebisitse Bibeleng ena. Mme sehloho sa ka bosiusing bona, bakeng sa mohlodithero, ke: *Diketsahalo Di Hlakiswa Ke Seporofeto. Diketsahalo Di Hlakiswa Ke Seporofeto.*

¹⁴ Jwale, Bibele ke Buka e fapaneng le dibuka tsohle tse ding tse kgethehileng. Bibele ke Buka e fapaneng. Ke Buka ya Seporofeto, e bolela diketsahaholo tse tlang. Mme hape Ke Tshenolo ya Jesu Kreste. Ho tloha ho Genese ho fihla ho Tshenolo, e Mo hlahisa ka botlalo ba Hae, seo A na a le sona le seo a leng sona. Mme Buka yohle e tletseng, Tshenolo 1:1 ho ya ho 3, e itse Buka ena ke Buka ya “Tshenolo ya Jesu Kreste,” e leng Lentswe la Modimo. “Tshenolo ya Jesu Kreste,” Lentswe la Modimo!

¹⁵ Jwale, dibuka tse ding tsohle, dibuka tse kgethehileng, e mpa e le ditaelo tsa boitshwaro, ditaelo tsa mekgwa, kapa taelo ya thutabomodimo. Ntho e...Ke ba bakae ba kileng bala Korane, Bibele ya Mohammed, le—le buka ya Buddha, le tse jwalo? Ke ditaelo tsa boitshwaro feela, seo batho ba lokelang ho se phela, kamoo ba lokelang ho phela, empa ha e porofete, ha e bue letho ka dintho tsena kapa ka dineo tse ikgethang tse fuwang motho ofe feela, ntho efe feela e tla etsahala. Jwalo ka ho joina loche kapa ntho e nngwe. Ka baka leo, ha dikereke di fihla moo di etsang kereke ya tsona loche feela ya ho joina, eba di tioletse hole le Lentswe la Modimo

¹⁶ Hoba Bibele ke bopaki bo phelang, bo boletsweng pele ba Jesu Kreste. Mme jwalo kaha lefatshe le holetse botlalong ba lona, le merara hape e holela botlalong ba yona, letsatsi le holela botlalong ba lona, Bibele e ne e bonahatswe botlalong ba Yona ka Motho Jesu Kreste. E ne e le Lentswe la Modimo le senotsweng, Buka yohle e tletseng ya Topollo. Bibele ke Lentswe la Modimo, le bolela diketsahalo tse tlang. Badumedi ba Yona ba laelwa ke Mongodi wa Yona ho bala le ho dumela Lentswe ka leng la Yona, e seng karolo ya Lona feela. Lentswe le le leng, hose le dumele, ho molemo o kgaotse ho leka ho fihlela o dumela Lentswe leo. Lentswe ka leng ka botlalo ke karolo ya Modimo ya Matlaohle; Modimo o bonahaditswe, a tlametswe Lentsweng la Hae, ho bontsha hore Yena ke Mang. Re a laelwa, jwalo ka badumedi, ho dumela Lentswe le leng le le leng la Yona. Mme E ngotswe ke Mongodi wa Modimo ka BoYena. Ha ho motho ya ka eketsang letho ho Yona kapa ho tlosa letho ho Yona. Ha o ka etsa hoo, e ne e tla ba mmele o sa itekanelang wa Modimo. O ne o tla ba, mohlomong menwana e tsheletseng ka seatleng se le seng, kapa—kapa matsoho a mararo, kapa ntho e nngwe, ho eketsa ntho e nngwe, ho fokotsa ho hong ho yona le ho haella ka letsoho le le leng, ho haella ka monwana o le mong. Ke Mmele o tletseng wa Jesu Kreste. Mme ho Kreste, kaha e le Monna, Monyadi, Monyaduwa o emetswe ka ho Yena hape. Mme ba babedi bana ba Bang. “Ka letsatsi leo le tla tseba hore Ke ho Ntate, Ntate o ho Nna, Ke ka ho lona le lona le ka ho Nna.” Ke setshwantsho se tletseng hakakang!

¹⁷ Mme badumedi ba nnete Lentsweng lena, ba Le amohelang ka tsela eo, ba Le dumela, mme ka mamello ba lebellé

ditshepiso tsa Lona tse porofetilweng, e nngwe le e nngwe ya tsona ho bonahatswa mongwaheng wa yona. Modumedi e mong le e mong o nnile a e shebella. Modumedi e mong le e mong ya neng a le malalaalaotswe, a shebile, ke yena ya na a senolelw.

¹⁸ Jwale shebang mehleng ya ho tla ha Morena Jesu. Hobaneng batho bao ba sa ka ba elellwa Johanne, athe Bibele e ne e boletse ka ho hlaka ka Esaia, “Ho tla ba le lentswe la ya howang felleng, ‘Lokisang tsela ya Morena’”? Moporofeta wa ho qetela eo ba bileng le yena, e leng Malakia 3, o itse, “Bonang, ke roma lengosa la Ka pela sefahleho sa Ka ho lokisa tsela.” Hobaneng ba sa e bona? Hobane ba ne ba shebile nthong e neng e entswe, ba theile mehopolo ya bona hodima molaetsa o itseng o hlahileng pejana, mme ba sitwa ho bona boiponahatso ba jwale ba Modimo tsatsing leo ba neng ba phela ho lona.

¹⁹ Mme Bakreste, hohle, ke hantle moo lefatshe le emeng teng bosiung bona. Ntle le kgang, ke mnene eo! Bakreste, hohle, ba leka ho sheba morao ditaelong tsa boitshwaro tseo Mongh. Luther a di ngotseng, kapa Mongh. Wesley, Sankey, Finney, Knox, Calvin; etswe, ha ho le ya mong wa rona ya ka e buang hampe, empa e ne e le letsatsing le fetileng.

²⁰ Bafarasi ba shebile morao ho seo Moshe a se buileng, mme ba re, “Re na le Moshe. Ha re tsebe moo O tswang teng.”

²¹ Empa hopolang, mohla Moshe mona, ba ne ba sa tsebe moo a tlang teng. Le a bona? Mme jwale ba . . . Ha ho makatse Jesu a itse ho bona, “Le khabisa mabitla a baporofeta, athe ke lona le ba kentseng mono.” Ha Molaetsa oa bona o se o fetile! Molaetsa o a feta, batho ba O bona, ba O soma (lefatshe le etsa jwalo). Mme ebe ka mora hoba moromuwa a fele le Molaetsa o fetile, ke moo ba hahang bodumedi bo hlaphiweng hodima Molaetsa. Mme ba shwelle mono, hantle mono, ha ba boele ba phela le ka mohla.

²² Shebang motsotso feela, ba bang ba lona batho, mme haholoholo ke bua le lona batho ba Katolike. Na lea elellwa, le kile la bala nalane, nalane ya kereke ya Roma e Katolike? Kamoo bashwelatumelo ba lona, ho qala ka Mohalaledi Augustine wa Hippo, ke dimilione tse kae tsa batho ba se nang molato bao kereke e ba isitseng lefung! Kea lebala, ha ke hopole lenane, empa le hodimo kwana dimilioneng, ha e sa le Mohalaledi Hippo wa . . . Mohalaledi Augustine wa Hippo, Afrika, a phatlalatsa hore ke thato ya Modimo ruri ho bolaya mang kapa mang ya hanyetsang kereke ya Roma e Katolike. Lea elellwa hore hoo, hore Mohalaledi Patrick ha a ka a ananelwa ha e se ka mora lefu la hae, jwalo ka Moroma wa Katolike? O ile a hanyetsa mopapa le diketso tsa hae tsohle, mme kereke ya Katolike ka boyona ya bolaya bana ba yona ba

mashome a dikete. Na lea tseba hobane kereke ya Katolike e tjhesitse Joan of Arc, mosadinya eo wa mohalaledi, sefateng, ka ho...ba re ke moloi. Dilemo tse makgolo a mabedi hamorao, ba epolla mebele ya baprista, ha ba fumana hore ho ne ho le phoso, mme ba e lahlela lewatleng, ba sa ba pate setsheng se kgethehileng, e le ho inyatsa.

Le se ke la dumella letsatsi ho feta hodima hloho tsa lona, mme la ba dithoto.

²³ Kamoo baprista bao ba ka ratang, bosiung bona, ho hlaha, bona ba ahlotseg Jesu. Ntho e le nngwe feela, ba sitilwe ho bona boporfeta ba hora eo. Hola ba...Jesu o itse, "Batlisisang Mangolo, hoba ho Wona le nahana," kapa, ke re, "le bolela le ena le Bophelo bo sa Feleng, athe Mangolo ke wona a le bolellang hore Ke mang," bakeng sa hora eo.

²⁴ Lemohang, Bibele e ke ke ya hholeha. Ke ntho e le nngwe e ke keng ya e etsa, Lentswe la Modimo, ho hholeha, hoba Le bolela esale pele diketso tsa Mongodi wa Lona pele A e etsa.

²⁵ Jwale, ho na le monyetla o le mong hodima e sekete ha monna a lepa ntho ho etsahala, mme e etsahale. Empa ha a beha *moo* e tla etsahala, hoo ho ka mo theolela monyetleng o le mong hodima e dikete tse leshome. Ha a bolela *letsatsi* leo e tla etsahala ka lona, hoo ho a e kgaola, monyetla o le mong hodima e ka bang milione. Le hore e tla hlahela *mang*, hoo ho e theolela ho menyetla e bilione.

²⁶ Empa Bibele ena e bolela ka nepahalo *mang, neneng, kae*, le hore ho shejwe *eng*, mme le ka mohla ha e hholehe. Ka baka leo, hase kgale haholo moqoqong o monyenyan le moprista wa Pelo e Halalelang hodimo mona; a re, "Mongh. Branham, o leka ho pheha kgang ka Bibele." Ho re, "Ntho eo ke histori ya kereke."

Ka re, "Hase histori. Ke Modimo ka boYena, kgatisong."

A re, "Modimo o kerekeng ya Hae."

²⁷ Ka re, "Modimo o Lentsweng. Mme ntho efe e kgahlano le Lona, e be leshano. Hoba O itse, 'Lentswe la Ka e be nnete mme lentswe la motho mang le mang e be leshano.'"

A re, "Ha re a lokela ho pheha kgang."

²⁸ Ka re, "Ha kea o kopa ho pheha kgang, empa Bibele ehile e re, 'Tloong, re botsisisaneng mmoho.'"

²⁹ E bolela diketso tsa Mongodi le pele A e etsa. Ha ho le jwalo, ho rialo, eba hoo ho beha monna ka mong le mosadi, Setulong sa Kahlolo, a se na boitatolo. Ha o nka seo Methodise e se buang ka Yona, seo Baptise e se buang ka Yona, seo Katolike e se buang, seo Pentekosta e se buang, kapa kereke efe feela, o ka nna wa fumana maswabi a mang Kahlolong. Empa ha o ka hlokomela seo Bibele e reng se tla etsahala, le mohla se etsahalang, ebe ke moo o tla elellwa se etsahalang.

³⁰ Jwale, ha ea hlaka pepenene hore batho bohole ba ka e bona, hobane Jesu o lebohile Ntate ka ho e patela mahlo a ba bohlale le ba masene, le ho e senolela masea a tla ithuta. Nahanang ka Modimo o Matlaohle o dutseng Lentsweng la Wona ka Sebele, ka matla a ho foufatsa barui le ba masene le—le barutehi ba rutehileng, ho foufatsa mahlo a bona ba se ke ba Mmona, le ho tutubolla mahlo a bafutsana le ba sa balang.

³¹ Lemohang batho bana ba tswang Emmause, O itse kutlwisiso ya bona—ya bona e ne e siretswe. Ba qoqile le Yena mme ba sa Mo tsebe ke Mang, letsatsi lohle. Modimo a ka etsa seo, hobane Ke Modimo.

³² Ke hantle seo A se entseng ho baprista bao, bangodi bao, hoba Ho no ho ngodilwe A ne a tlameha ho etsa hoo. Modimo wa foufatsa mahlo a bona re tle re be le monyetla. Lemohang, ba ne ba sa bone, ho sa tsottelehe ke barutehi ha kae, e ne e le baprista ha kae, see ba ne ba se entse, ba nna ba sitwa ho E bona, hoba ba ne ba foufetse. Mohlomong pono ya bona e ne e hlakile, nameng. Empa pono ya bona ya moyo!

³³ Ke yona ntho eo ke lekileng ho e bua hoseng hona mabapi le bofebe ba basadi, kamoo ba aparang jwale. Ke bafebi. Bukeng ya Modimo ba molato wa bofebe nako le nako ha ba apara diaparo tse chachehisang nama. Moya wa bona, ha o tsebe. Ke dumela basadi bao, bongata ba bona, dikete tsa bona, ha ba na molato, mme ba ke ke ba feba ho hang. Mme basadi ba batho, ka motho ya ba dumellang ho e etsa, a sa e pepese le ho bolela nnete, ba feba. Etswe, Bibele e itse, “Seotswa se dutseng hodima metsi, seo marena wohle a lefatshe le batho ba lefatshe, dikereke le dintho tse jwalo, ba febileng le sona moyeng. Mme e ne e le MMA DIOTSWA,” diphutheho tse mabitso.

³⁴ Rona re sheba Bibele, hobane Modimo ha a re tlohellle lefifing. O rometse Bibele ho re bolella diketsahalo pele di hlaha, le yona tlhaho le nako eo di tla fihla ka yona.

³⁵ Jwale, ho tshwana le ho sheba almanaka ho bona hore ke letsatsi lefe. Ha o nahana, hore ona ke Moqebelo ona, Sontaha, ke eng? Sheba almanaka. Almanaka e tla o bolella hore ke letsatsi lefe. Ha o bona diketso tsa batho, mohlomong ho uwa kerekeng, o bona e—e... ho utlwa tshepe e lla, o a ipotsa ke letsatsi lefe. Sheba almanaka, e tla o bolella hore ke letsatsi lefe.

³⁶ Mme ha o bona kereke e tshwana le lefatshe, jwalo ka mehleng ya Sodoma, o bona kereke ya lefatshe e kena yohle... . ho rapela “modimo wa mongwaha ona o kgopo,” le ho bona seo; o ntoo bona sehlotshwana se phuthehile ka ntla tlasa tlotsa ya Modimo, se boela se hlahisa Bophelo ba Jesu Kreste, ka Mangolo a tshwanetseng ho etsahala, o a tseba hore ke hora efe eo o phelang ho yona.

³⁷ Bibebe ena e bolela e sa le pele, ka seporofeto, hore re phela letsatsing lefe, le hore re phela nakong efe, le hore ke diketsahalo dife tse loketseng di be di etsahala. E bolela e sa le pele. E bolela hantle ho fihla letereng, mme ha eso fose mongwaha o le mong, ka dinako tsohle. Ha E-so fose le ka mohla, mme E ke ke, hoba ba reretsweng ho e bona ba tla e bona. Jesu o itse, “Ha ho ya ka tlhang ho Nna, a sa hulwe ke Ntate, mme bohle bao Ntate a Mphileng bona ba tla tla.” Ke Lentswe le kopanang le Lentswe. Le ke ke la etsa letho le sele. Re a le tseba, letsatsi leo re phelang ho lona.

³⁸ Empa jwalo ka ha ho etsahetse mongwaheng o mong le o mong, batho ba dumella banna ho kenya boitlhalosetso ba bona Lentsweng lena, mme hoo ho ba foufaletsa diketsahalo tse etsahetseng. Ho entswe ntho e tshwanang ka Bafarasi le Basadusi. Esita leha Pauluse a na a eme mono a leka ho qotsa Lengolo, mme monna e mong a mo jabela sefahlehong hobane a bitsitse moprista e moholo lebota le sweufaditsweng. Mme yaba ba sitwa ho bona Modimo a thasisetsa Lentswe la Hae le porofetilweng.

³⁹ Le a bona, Bibebe ha leane ka boYona; Bibebe ke Modimo. Ho Modimo ho leana ha ho fumanwe; O phethahetse.

⁴⁰ Empa batho, ka boitlhalosetso ba bona! Jwale lemohang, ha nke ke le bontshe, metswalle. Dikereke ha di kgone ho ka tlhaloso ya Yona. Methodise ha e dumellane le Baptise, Baptise le Presbeteriene, Presbeteriene le Mapentekosta. Mme mekgatlo e fapaneng e mashome a mane ya Pentekosta, ha ba kgone ho dumellana. Ka baka leo le a bona, e tla be e le Babilona hape, ho ferekanya.

⁴¹ Empa Modimo o Itolokela ka boYena Lentswe la Hae. O tshepisitse ntho ena, mme e ntoo etswa ke Yena. Yena ka Sebele, O fana, ka tlhaloso ya yona, hoba O Itsebahatsa horen eo. Kamoo e—e Mmele wa Kreste o kgathileng tema, ho tloha maotong ho ya hlohong!

⁴² Lemohang, ke lona lebaka leo batho bana ba sitwang ho e tshwara, hobane ba mamela seo motho e mong a se buang ka Lona, bakeng sa ho bala Lentswe kamoo Jesu a ba boleletseng ho etsa, “Mme ke Wona A Mpakang. Batlisisang Mangolo, ho Wona le nahana le na le Bophelo bo sa Feleng, mme ke Wona A Mpakang.” Ka mantswe a mang, mamelang, “Eng? Balang Mangolo ho bona seo Messia a ne a lokela ho se etsa. Ho bona nako eo Messia a ne a tlamehile ho tla ka yona. Ho sheba ya neng a tla etella Messia pele. Shebang hora. Eka khona ho be le lentswe la ya howang felleng, Johanne. Mme le mo entse hantle kamoo ho ratileng lona. Shebang seo Ke neng ke loketse ho se etsa ha Ke fihla. Mme jwale le entse’ng? Na Ke hlolehile ho phetha Sena?” Le a bona, Jesu o a bua, “Na Ke hlolehile ho phetha Sena?”

⁴³ Lemohang, ha re theoha ka Mangolo thapama ena, kamoo tsohle tse neng di porofetilwe ka Yena di etsahetseng hantle ka tsela e neng e tshwanetse. Ba loketse ba be ba tsebile ketsahalo ena. “Lehlanya lena, thaka lena le hlahileng, le ka bang dilemo tse mashome a mararo le metso e meraro le... kapa dilemo tse mashome a mararo, mme le theohetse mono ho tlaleha Masedi a mefuta eohle, le Maeba a nyolohang. Mme, kgele, e ne e le e—e dihlong feela.” Ba itse, “O tswetswe ke batswadi ba seng molaong, ho thwe O tswetswe ke morwetsana.”

⁴⁴ Na ba ne ba sa tlameha ba be ba tsebile hore Esaia o boletse, ho Esaia 9:6, “Re tswaletswe ngwana”? Na hape ha ba tlameha ho tseba hore moporofeta Esaia o boletse, “Morwetsana o tla emola”? Ba tlamehile ba be ba tsebile dintho tsena. Empa, le a bona, lebaka la yona, ba ne ba e beella kae-kae hole kwana pele. Mme Monna enwa, ho bona, o ne a sa lokele kgetho. Empa A ba kopa, “Batlisang Mangolo, hoba ho Wona le nahana le na le Bophelo bo sa Feleng, athe Wona ke yona ntho e pakang Molaetsa wa Ka.” E seng seo moithuti ea itseng wa thutamodimo a se buileng; empa seo Modimo, Lentswe la Hae ka boYena, le boletseng se tla etsahala! Amen!

⁴⁵ Ho a tshwana jwale! Batlisang Mangolo, hoba ke Wona A re bolellang hora eo re phelang ho yona, ho re bolella hantle se tla etsahala tsatsing lena. Ke Wona Ao le tlamehileng ho itshetleha ka wona, hoba ke Wona a pakang ka Motho Jesu Kreste. Hobane Bibebe e boletse, ho re, “E sa le Yena maobane, kajeno, le ka mehla,” hobane Yena ke tshenolo ya Lentswe mongwaheng. Ho ke ke ha fapanha ka letho.

⁴⁶ Ka baka leo ka ho mamela tlhaloso ya motho, ba bona thasisetso ya Lentswe la Modimo le phethahatswang, ba sitwa ho E bona. Hobane, e tswela pele kamehla, empa kahobane ba mamela... Mme Jesu o itse, “Ke baetapele ba foufetseng.” Mme ha sefofu se tsamaisa sefofu, ba hlahelwa ke’ng? Jwale hopolang, Bibebe e boletse hore mongwaha ona wa bokereke wa Mongwaha ona wa Laodisea o ne o le sefofu. Ba ne ba Mo beile ka ntle ho kereke. Ha ho mongwaha o mong, mongwaha wa phutheho e nngwe, moo Jesu a ne a le ka ntle. Haese mongwaha wa phutheho ya Laodisea, O ne a le ka ntle, a leka ho kena, “Ke eme monyako mme kea kokota.” O tlamehile a be a le ka hare. Empa O itse, “Empa erekaha o re, ‘Ke morui, ke mononi, ha ke hloke letho,’ athe ha o tsebe, ha o tsebe hobane o sefofu, se tsamaisang difofu, o mufatsana moyeng, o soto, o madimabe, o feelsa, mme ha o tsebe.” Ha se le mae... Hola motho a hlobotse seterateng, a le madimabe, a foufetsese, mme a tseba a na le kelello e lekaneng hoo o ka mmolellang hore o feelsa, o ne a tla leka ho etsa ho hong ka yona. Empa ha a tsokotsa hloho ya hae, ho re, “Ha ke E batle. O mang wena o ka mpolellang hore ke etse’ng? Ke tseba moo ke emeng teng.” Jwale, ha e se pono e haulang eo, ha ke tsebe. Mme ke hantle

seo Modimo wa Bibele ena a itseng kereke ena e tla ba sona, mongwaheng o kgopo ona hantle hona jwale, mongwaheng wa kereke ya ho qtetela eo re phelang ho yona.

⁴⁷ Lemohang, empa ho batho, “Bao Ke ba ratang, Ke a ba kgalema.” Jwale, ha o kgalengwa ke Morena, molebana le seo o se etsang, tswa moo he! Sutha ho yona. “Bao Ke ba ratang, Kea ba kgalema.”

⁴⁸ Jwale, ho bona Modimo, jwale, hola Baferasi bao ba re, “Be butleng. Monna eo o hlile o re phepheditse, O itse, ‘Batlisisang Mangolo, hoba ho Wona le nahana le na le Bophelo bo sa Feleng; ke Wona A Mpakang.’ Ho ka ba molemo ha nka boela ka sheba Mangolong le ho fumana seo A lokelang ho se etsa, hore Ke Mang, se loketseng ho etsahala. Ke tlamehile ho sheba morao le ho fumana”? Bakeng sa hoo, ba ya ho baprista le ho ba botsa, “Ho ka thweng ka Yona?” Le bona phapang? Ba tshwanetse ba be ba ile ba bala Lentswe.

⁴⁹ Ho Baheberu 1:1, Bibele e itse, “Modimo, mehleng ya boholoholo,” ke ho re, “nakong tsa kgale le ka mekgwa e mengata ha a ngotse Bibele ka baporofeta.” Jwale lemohang, O ngotse Bibele ka tsela ya Hae ka Sebele a e kgethileng. Le a bona? Jwale, O ne a sa tlameha ho E ngola ka tsela eo, le jwalo O ne a sa tlameha ho pholosa motho ka Madi. O ne a sa tlameha ho bolela Evangedi ka motho; O ne a ka dumella letsatsi kapa kgwedi kapa dinaledi ho bolela Evangedi, O ne a ka dumella meya ho hweshetsa Evangedi. Empa O kgethile motho! Mme O kgetha mokgwa oo Lentswe la Hae le tileng, mme e ne e le ka baporofeta ba Hae ba neng ba rerilwe-pele le ho tlotswa-pele, e le karolo ya Lentswe la Modimo, ho tsebahatsa tshenolo ya Lentswe la Hae mongwaheng oo le nakong eo. “Hoba Lentswe la Morena le tlie ho baporofeta ba nnotshi.” Ha Le tle ho moithuti wa thutamodimo ho hang. Mpontsheng Lengolo. Le tla ho baporofeta feela. Modimo a ke ke a bua leshano. Ka baka leo Modimo o ngotse Bibele ka tsela ya Hae e kgethileng, le baporofeta ba Hae ka Sebele ba kgethileng; e seng baporofeta bao motho a ba kkgethileng, empa baporofeta bao Modimo a ba kgethileng.

⁵⁰ Ebe moo badumedi ba Yona ba shebang phethahatso ya seo baporofeta ba bona ba se buileng, mme boo ke boitsebiso ba hore ke baporofeta ba Modimo. Hobane, pele, ba buduletswe. Ntho e latelang, ba dula hantle le Lentswe la hora. Eba hoo ke ditshwanelo tsa hae. Le a bona, re fetile moo Sontaha se fetileng. Ho tla hlaha baporofeta ba bangata ba bohata. Mme re fane ka ditshwantsho kamoo Balaame le Moshe, bobedi ba bona ba ne ba tlotsitswe ke Moya o le mong, e mong wa bona o itse, “Bohole re bang. Tloong re kopane, ho kopanya banana ba rona le tsohle mmoho. Re na le banana ba batle mona, mme o tshelele ka kwano o inkele

mosadi e motle. Hoo ho itoketse, re batho ba le bang, le hona, moloko o le mong.” Modimo ha o a ka wa hlola o ba tshwarela hona. Ba ile ba mamela hoo.

⁵¹ Le a bona, lefatshe le e—e batho ba shebile feranyana e itseng, lekgalonyana le itseng, tselana e itseng e kgaoletsang, empa ha ho tsela e kgaoletsang Lentsweng la Modimo. Ho na le Paterone e le nngwe. O tlamehile ho itsheha o lekane Paterone eo, e seng ho leka ho seha Paterone ho o lekana. Motho e mong le e mong o tshwanetse ho etsa jwalo. Ke yona feela tsela eo Modimo a e sebetsang ka yona.

⁵² Lemohang jwale, badumedi ba emela ho thasisetswa ha Lentswe leo. Le a bona, ha Le a ngolwa ke motho, empa ke Morena Modimo, ka baka leo Ha se buka ya motho.

⁵³ Motho e mong o re, “Ke mengolo e itseng ya kgale ya Baheberu.” Na Baheberu ba ka ngola lengolo le ba ahlolang? Na setjhaba se kgabane seo sa Bajude, se ikakasang le se bentshitsweng, na ba ka ngola makgopo a bona, ho ikahlolka ka bobona? Ruri ha ho jwalo. Ho bua ka dibe tsa sona, kamoo ba keneng tshebeletsong ya medimo, kamoo ba entseng bohlola kgahlano le Lentswe la Modimo? Tjhe, tjhe. Ba ke ke ba rialo, setjhaba seo se ikgantshang.

⁵⁴ Hase buka ya motho. Ke Buka ya Modimo. Mme monna ya bonang dipono kapa a utlwa Kodu ya Modimo, o ne a sa e utlwisise (hangata) ka boyena, mabakeng a mangata. Le a bona? Hase batho ba ngotseng Bibele. Modimo o ngotse Bibele. Ha se...Hase buka ya motho. Ke Buka ya Modimo. Ke mehopolo ya Modimo e pepesitsweng ke melomo ya motho. Ke hona ho e E etsang Bibele. Mohopolo o pepeswang ke lentswe. Mme tshimolohong e ne e le Mohopolo wa Modimo, A O pepesa ka melomo ya baporofeta ba Hae le ho O thasisetsa ka bahlanka ba Hae. Le a bona? Lemohang.

⁵⁵ Modimo o Ikethele ka boWona, ka boitherelopele, o kgethile baporofeta ba mongwaha o mong le o mong. Le e lemohe. O hlophisa semelo sa moporofeta eo ho dumellana le mongwaha oo. Le a bona, O hlophisa mokgwa wa hae, seo a se etsang. O mo hlophisa ka hore o rutehile kapa ha a ruteha. O hlophisa dineo tsa hae, mokgwa oo a tla rera ka wona, dineo tseo a tla ba le tsona. Le Molaetsa wa mongwaha oo o itseng, Modimo o rerile ntho eo ho etsahala mme ha ho ntho e ka tlatsang sebaka sa yona. Ho sa tsotelehe seo e leng sona, hore ke ditshibollo tse kae tse entsweng ke batho, ha ho letho le ka tlatsang sebaka sa yona. O rerile monna eo esale pele, mohlomong monna ya sa balang. Mohlomong o mo rerilepele ho ba monna wa mofuta o mong. Sohle seo a leng sona, O mo fa maemo a hae, e—e dineo tsa hae, ho mo fa semelo sa hae, mokgwa wa hae, le seo e ka bang sona, kamoo a itlhulosang kateng, le sohle seo a se etsang. O etsa hore monna wa hora a tshwase batho ba hora. Hantle. O a e etsa.

⁵⁶ Pheletsong ya mongwaha o mong le o mong, ha kereke e sokolohetse lefatsheng le sebeng, mme e sekametse tlhalosong ya motho ya Lentswe. Jwalo ka mehla, bao ka mehla, pheletsong ya mongwaha, ba kentswe hlekehlekeng e kakang ke baithuti ba bona ba thutamodimo le baprista ho fihlela e le hlekehlek e kamehla. Tlhaloso ya bona e fosahetse kamehla, ha ho mohla e kileng ya hlolleha ho fosahala. Mme ha ho mohla Lentswe la Modimo le kileng la hlolleha ho ba nnete. Ke yona phapang.

⁵⁷ Jwale le a bona, Modimo o ngotse Bibebe, ka boYena. Jwale, Modimo a ka bua. Moshe o boletse A buile le yena. Jeremia o itse, “O beile mantswe molomong wa ka.” Mme Modimo a ka ngola. O ngotse melao e leshome ka monwana wa Hae ka Sebele. O ngotse maboteng a Babilona. Mme, le hopole, ka Testamenteng ya Kgale feela, baporofeta ba buile makgetlo a dikete tse pedi ba re, “HO RIALO MORENA!” Modimo a ka bua, Modimo a ka ngola. Ruri. Ekaba dipesente tse mashome a robong tsa Mattheu, Mareka, Luka, le Johanne, e leng Mantswe a Modimo ka boYena, Jesu Kreste ya buang. Ka baka leo, ha Modimo a kgona ho ngola, ha Modimo a kgona ho bala, ha Modimo a kgona ho bua, na A ke ke a etsa hore ba bang ba etse jwalo? Ana ha A re ho Moshe, “Ke mang ya entseng motho semumu kapa ke mang ya mo fang puo?” Modimo o ngotse Bibebe ka baporofeta, mokgwa wa Hae wa ho e sebetsa.

⁵⁸ Jwale nako le nako ha kereke e tswakana (etswe Modimo a tsebile pele ba tla etsa hoo, hoba O tsebile dintho tsohle pele), ka baka leo O lokiseditse mongwaha oo moporofeta wa Hae ya ikgethileng, ho bitsa kgetho ya Hae ka Lentswe le netefaditsweng la mehlolo le meeka, le ka thasisetso ya Lentswe la Hae, “ho tiisa Lentswe ka mehlolo le meeka e latelang,” jwalo ka ha A tshepisitse. O fana ka tlhaloso ya nnete ka mora hoba moporofeta ka boyena a netefatswe.

⁵⁹ Bao bohole, ntle le bakgethwa bao a rometsweng ho bona, ba mo hloya. Jwale, ak’o hlahlobe kgetlo ka leng mme o bone hore e nepile kapa tjhe. Ke bao a rometsweng ho bona feela! “O tlie ho ba Habo, mme ba Habo ha ba ka ba Mo amohela. Empa ba Mo amohetseng, O ba neile matla a ho ba bana ba Modimo.” Lemohang, ha ho...hlahlobo e nngwe le e nngwe ya Lentswe, kgetlong le leng le le leng, le pheletsong ya mongwaha o mong le o mong kapa sehlohlolo kapa mateano, jwalo ka ha ke rerile ka wona hangata.

⁶⁰ Shebang mongwaheng wa Nohe, sehlohlolong pele ho kahlolo. Ho etsahetse’ng? Nohe, ke ba lelapa la hae feela ba dumetseng monna eo. Ba bang bohole ba mo nyatsitse. Le ho timetsa lefatshe lohle.

⁶¹ Mehleng ya Abrahama, ke sehlopha sa Abrahama feela se dumetseng. Mohla Mangeloi a theohang le ho rerela Sodoma, e bile Lota le mosadi wa hae feela le baradi ba babedi ba tswang, mme a boela a fetoha tshiya ya letsawai.

⁶² Mehengl ya Moshe, ke bakgethwa ba Israele feela ba tswileng. Mme Faro o ne a mo hloile.

⁶³ Mehengl ya Elia, ntho e nngwe le e nngwe (mohlomong) ntle le banna ba dikete tse supileng, e mong le e mong wa bona o ne a mo hloile, setjhaba sohle.

⁶⁴ Mehengl ya Jeremia, kgele, ba mo bata ka tholwana e sa butswang, mme ba mmitsa lehlanya, kahobane a ile a robala ka lehlakore la hae matsatsi a badilweng, le ka lehlakore le leng, mme—mme a nka dintho mme a etsa dipapiso. Ba mo hloilo.

⁶⁵ Esaia moporofeta, a ahlola setjhaba seo ba ba ba mo sehla dikoto tse pedi ka saga. Hantle.

⁶⁶ Johanne Mokolobetsi. “E ne e le monna ya hlaha tlase mono, lehlanya le hweletsang.”

Bohle ntle—ntle le barutuwa bao a ba hlasisitseng ho Jesu Kreste jwalo ka kereke! Ke eo moo e teng. Johanne o ile a lokisa batho. O ne a ena le ba bakae? O no o ka bala ka menwana e mmedi...ka diatla tse pedi, menwana ya hao, bongata boo Johanne a bo hlasisitseng ho Jesu mohla A ne a fihla. Jwale, ho ka thweng ka ho Tla ha Hae labobedi? E nahanneng.

⁶⁷ Empa ha badumedi ba makgonthe ba Bibebe ba bona Lentswe le netefaleditswe mongwaha oo ka ho phatlalatsa, ba dumela. Ha ho mokgwa wa ho ba thibela Lona, ba Le dumela. Ba bile ba tiisa bopaki ba bona ka madi a bona. Ba Le dumela. Lona ka hona ke ho bona, ba rerilweng pele, bao ba mongwaha oo ba bonang le ho dumela.

⁶⁸ Ba bang ha ba kgone feela ho E bona, ba foufetse. Jwale, o re, “Ha ba kgone ho E bona.” Jwale, jwalo ka Balaame, hobaneng Balaame a ne a sa bone Hoo? E ne e le moporofeta, a tlotsitswe. Hobaneng Faro a sa kgona ho E bona? Ha a bona letsoho la Modimo le theoha le etsa mehlolo mono, ya mpa ya thatafatsa pelo ya hae. Na ho jwalo? Hobaneng Dathane a sa kgona ho E bona, e le Mojude ka boyena? Hantle ka ntle mono, o ne a fetile Lewatleng le Shweleng, le ho ja manna bosiu ka bong, a weleng a le matjha, mme a ntse a sa kgone ho E bona. Hobaneng Kora a sa E bona? Hobaneng Kaifa a sa E bona? E ne e le hlaho ya borapedi ba lefatshe nakong eo. Hobaneng a sa bona hore eo e ne e le Messia? Hobaneng Judase a sa E bona? Judase o ne a ena le bona hantle, a tsamaya le bona, a etsa mehlolo le bona. Empa Lentswe le ne le lokela ho phethwa. Bibebe e re ba ne ba hlasisitswe ho nka sebaka seo. Ba ne ba hlasisitswe ka sepheo seo. Ke nnete. Baroma 8 e rialo.

⁶⁹ Jwale badumedi ba ka bona hobane Lentswe le entswe nama molokong wa bona, Modimo o a bua. Jwale, badumedi bao ba nnete ba makgonthe, dikete tse supileng tseo (kapa e ne e le

makgolo a supileng?) mehleng ya Elia. Dikete tse supileng ke tsona. Mehleng ya Elia, ho bile le banna ba dikete tse supileng ho tswa dimilioneng tse pedi kapa tse tharo, ba boneng hore Hoo e ne e le nnete. Hase le a le mong hara batho ba lekgolo, lekgale. Empa ba bone hobane E napahetse. Ba bone Modimo a bonahaditswe. Mohlolohadi eo wa kgale eo Elisha a neng a rometswe ho yena, a tswile ho thonaka dithutswana tseo, ho etsa senkgwa, mme ho lekane ho etsetsa yena le mora wa hae, mme ba ntoo shwa. Empa shebang Elia, a re, "Etsetsa nna, pele. Hobane, HO RIALO MORENA, faki e ke ke ya fela mme le lefiso le ke ke la oma ho fihlela tsatsi leo Jehova Modimo a tla romela pula lefatsheng." Ho se potso, a raoha ho ya etsa senkgwa le ho mo tsholela. Ho re, "Etsa sa ka pele, mme o ntoo ya o etsetse wena le mora wa hao." Hobane, mosadi o utlwile monna eo, mme a mo sheba; e ne e le peo e rerilweng pele.

⁷⁰ Bongata ba bona ba re, "Ke leo lehlanya leo la kgale hape. Modimo o re rohakile ka baka la hae," le hopole, Elia. Ho re, "Ke wena ya ntseng a ferekany Iseraele."

⁷¹ A re, "Ke wena ya ferekantseng Iseraele." Bonang eo Modimo... Ke Lentswe la mang leo A na a le netefatsa? Lentswe la Hae ka Sebele.

⁷² Jwale Bibele e re ba ne ba hlahisitswe ka morero wona, empa ha... e—e mosadumeleng. Empa jwale ha modumedi wa nnete a kgona ho bona Lentswe la mongwaha oo le etswa nama, Modimo a bua ka dipounama tsa motho a ntoo etsa hantle seo A boletseng A tla se etsa, hoo ho a e phethahatsa!

⁷³ Jwale le e shebe kaofela. Le se ke la sheba dipontsho. Ha le sheba dipontsho, le tla thetswa ruri. Ho tla hlaho baporofeta ba bohata mme ba tla bontsha mehlolo le meeka e tla thetsa bakgethwa hola ho ka etswa. Shebang Lentswe. Shebang baprista bana, baporofeta bana, moporofeta wa Moheberu ya emeng mono. Tsedekia a tshwere dinaka tsa ditonana, le ho re, "Ke nna moporofeta-ya-kgethilweng-se-Modimo." Ke nnete. "Ke na le ba makgolo a mararo le mashome a robong le metso e robong ho nna mona hantle, mme Moya o Halalelang o hodima rona, o thasisetsa hore lefatse ke la rona. Ha re nyoloheng re le hape. Mme ka dinaka tsena, Akabe, o tla sututsa sera se lelekwe mobung wa rona, hobane Modimo o re file mobu oo."

⁷⁴ Hlokamelang monna eo morapedi, monna ya lokileng, Josafate, a re, "Ha le sa na e mong hape?"

⁷⁵ "E mong hape? Ho na le makgolo a mane a ntsweleng!" A re, "E, e mong o teng mona, empa ke mo hloile." Ho re, "Ha a phetse ho re omanya kaofela le ho re bolella kamoo re leng baetsadibe ba baholo kateng, le ntho yohle." Ho re, "Ke mo hloile! Yena, ke Mikea, mora Imla."

⁷⁶ A re, "Oho, morena a se ke a rialo. Eyang le mo late mme re utlwile seo a se buileng."

⁷⁷ Ka hona ba mo theolela mono. A re, “Mpheng bosiu bona mme ke tla bona seo Morena a se buang ka yona.”

⁷⁸ Akabe a re, “Ke a o hlapantsha, o se ke wa mpolella letho ha e se nnete.”

⁷⁹ Mme monna e mong a tla, ho re, “Jwale, ha o batla ho kgutlela bolekaneng bo monate, bua feela jwalo ka bona bohle.”

Mikea a re, “Ke tla bua feela seo Modimo a se buang.” Le a bona?

⁸⁰ Hoseng ho hlahlamang, ba tswa. Marena a apara diaparo tsa wona, a dula kgorong, dimelala kaofela. Moporofeta a eme mono. Ho re, “Jwale, lehlanya tote, o reng ka yona?”

⁸¹ Ho re, “Nyoloha.” Ho re, “Empa ke bone Iseraele e qhalane jwalo ka dinku tse se nang modisa.”

⁸² A ja-... a ntsha letsoho mme a mo jabela molomong. Moporofeta a jabela moporofeta molomong. Jwale, baporofeta bao ba babedi ba tlotsitsweng ba eme moo, ba porofetile, makgolo a mane kgahlano le a le mong, e ne e bonahala e le matla haholo. Jwale, kamehla polokeho ha e fumanwe bongateng ba dikeletso. Ho itshetlehile moo ba... ho seo ba eletsanang ka sona, seo keletso ya bona e leng sona. Polokeho ya morena e ne e le siyo mono, mme a nka keletso ya letshwele leo e nepahetse. Empa hola a ema a phetla mangolo le ho sheba seo Elia a sa tswa se bua.

⁸³ Jwale he, Mikea o ne a ke ke a bua letho, o ne a sa tsebe, athe mohlomong Modimo o na a mo tshwarele yona. Empa pele, kaha e le moporofeta, a ya ho Modimo ho fumana seo Modimo a se buileng. Mme a fumana seo Modimo a se buileng. A re, “Ke bone Modimo a dutse teroneng, mme A re... A teetswe hare ke makgotla wohle a Hae a Lehodimo, ho re, ‘Re ka roma mang ho mo theolela tlase mane ho ntshetsa Akabe mona, ka mantswa a mang Re tle re kgone ho phethahatsa seporofeto se entsweng ka yena?’”

⁸⁴ Le a bona, seporofeto, Elia o ne a se a itse, “Dintja di tla nyeka madi a hao.”

⁸⁵ Mme kahoo a re o “bone moyo o bolotsana o nyoloha fatshe, wa tla, wa tla ema pela Hae, ho re, ‘Ke tla theoha le ho kena baporofeteng ba hae, baporofeta ba Akabe, mme ke ba etse hore ba porofete leshano.’”

⁸⁶ Jwale, Modimo o tsebile banna bao ba ne ba ikgohomositse mme ba tletse thutamodimo hoo ba neng ba nahana ntho yohle e ne e ba loketse. Ba ne ba sa ka ba lemoha Lentswe la hora. Kahoo Modimo wa re, “O tla atleha; theoha.” Mme eitse ha Mikea a rialo, hoo ho ba entse hore ba porofete tlasa moyo o mobe. Ba ka be ba ile ba hula polaka ya fonofono, kapa ba kwala seyalemoya, kapa ho etsa ntho efe feela; ba utwlike Ntho

eo e tla kgahlano le bona, ho ema le ho tswa. Empa shebang se etsahetseng. Jwale, Mikea o ne a lokela ho hlahloba pono ya hae le Lentswe le ngotsweng, ka baka leo a tseba.

⁸⁷ A re, “Ha ke fihla... Kenyang monna eo teronkong, mo feng metsi a mahlomola le bohobe ba mahlomola. Mohla ke kgutlang, ke tla sebetsana le yena.”

⁸⁸ A re, “Ha o ka kgutla le ka mohla, e tla ba Modimo ha o ka wa bua le nna.” Ke mohla a tsebang hore pono ya hae e dumellana hantle le Lentswe ka leng la hora eo. E ne e le nako ya Akabe.

⁸⁹ Moena, kgaitsedi, ena ke hora le nako ya ho bitsetsa ka ntle ho Babilona. Masedi a mantsiboya a fihlile. Tsamayang Leseding lesedi le sa le teng. Lemohang, badumedi ba bone Lentswe le bonahatswa mme ba Le dumela. Jesu o itse, “Dinku tsa Ka di tseba Kodu ya Ka, Lentswe la Ka, dipontsho tsa Ka tsa mongwaha. Wa bohata di ke ke tsa mo latela.”

⁹⁰ Jwale ha re kgutleleng mohloditherong wa rona, hobane kea bona hore ke tla ya hole. Ke batla ho toboketsa moleng oo wa thapelo haholo. Ha re kgutleleng mohloditherong jwale oo re o nahanisisang, mona motsotso. Tjhe, e tla etsahala hape jwalo ka ha e entse kamehla, jwalo ka tlwaelo.

⁹¹ Modimo o rometse moporofeta wa Hae, Johanne, jwalo ka ha Lentswe la Hae le boletse, le tshepisitse ho Malakia 3, “Bonang, Ke roma Lenqosa la Ka pel'a Ka, ho lokisa tsela.” Johanne o pakile ntho e tshwanang. Mme rea fumana hape, ho Esaia 40:3, hore Esaia o itse, “Ho tla ba le lentswe la moporofeta, ya howang felleng, ‘Lokisang tsela ya Morena.’” Le a bona? Diporofeto tseo tsohle! Mme—mme le shebe, lemohang ka potlako, Lengolo le mo tsebahaditse.

Mohla ba reng, “O mang? Na o Messia?”

A re, “Ha ke yena.”

“Na o Jeremia? Baporofeta, kapa e mong wa bona?”

⁹² A re, “Ha ke yena. Empa ke lentswe la ya howang felleng, jwalo ka ha ho boletse moporofeta Esaia.”

⁹³ Le nahana ba ne ba ka dumela seo? Tjhe, monghadi. Hobaneng? O ne a sa tswe kerekeng ya bona. E ne e se wa bona... Le a bona, o ile felleng a le dilemo tse robong, mme a tswa a le mashome a mararo. Molaetsa wa hae o ne o le moholo haholo ho ka feta sekolong sa thutamodimo; e ne e le yena ya tla tsebisa e—e Messia. Mme batho ba ne ba tla be ba mo hulela ka *nqena* le ka *nqane*. Mme Modimo a mo romela lefelleng, ka mora lefu la ntata'e, Sakaria. Mme e ne e le moprista, empa ha a ka a latela tsela ya ntata'e.

⁹⁴ Hobane, baporofeta ha ba tswe dinthong tse kang tseo. Ba tswa mafatsheng a kgohlahetseng, felleng. Ha ho motho ya tsebang moo ba tswang teng, kapa hore ba hlaha jwang

sebaeng, kapa nalana efe feela ya bona. Ba tswa feela mme ba rera Lentswe, mme Modimo a ba tlose, ebe ba ile; ba ahlola moloko oo, mme ba tswella ho kena Lentsweng la Hae, ba emetse letsatsi le leholo leo.

⁹⁵ Kereke e ne e sa mo dumele, hobane ba ne ba sa mo tsebe. Ba ne ba se na rekoto ya hlomamiso ya hae dibukeng tsa bona, kahoo ka baka leo ba mo hana. Le a bona, ba ne ba sa dumele Lentswe la Modimo le netefaditsweng, ka ho hlaka, letere ka letere. Le a bona? Malakia 3, Mangolo a mabedi ho mo netefatsa, Malakia 3 le Esaia 40:3. Le a bona, Mangolo ao a mabedi a buile ka monna ya tlang, ho lokisa tsela ya Morena. O phethile tshwanelo e nngwe le e nngwe ya lona.

⁹⁶ E ne e tla ba moporofeta. “Ke tla le romella Elisha.” Mme ke eo, ka mokgwa o mong le o mong o kgohlahetseng. Hlokomelang kamoo tlhaho ya hae e ne e nyalana le ya Elia. Elia e ne e le monna wa felleng, le Johanne o ne a le jwalo; ka ntle. E ne e se monna ya boreledi, e ne e le monna ya kgohlahetseng.

⁹⁷ Lemohang hape, Elia e ne e le mohloyi wa basadi, o boleletse Jesebele ka feref yohle ya hae, le hore a ka palama le ho theoha kae. Le Johanne o ne a le jwalo. Jesebele o lekile ho bolaya Elia, a hlapanya ka medimo ya hae ho re o tla mo kgaola hloho. Le Herodia o entse jwalo. Le a bona?

⁹⁸ Kamehla le shebe molaetsa wa bona, shebang seo ba se entseng. Jwale re fumana hola ba sheba morao le ho bona seo Bibebe e se buileng, le ho sheba tlhaho ya monna le kamoo a na a le nakong ka ho phethahala Mangolong le nthong e nngwe le e nngwe, ba loketse ba be ba tsebile hore e ne e le yena. Ekaba halofo ya tosene e tsebileng. Ke hantle. Ba e eleletsweng ha ba fete le halofo ya tosene. Ba ile ba ya mo utlwa, empa ha ba ka ba E dumela. Lea bona? Hobaneng? Ba ne ba sa dumele boitsebiso ba seporofeto horeng ya bona.

⁹⁹ Lemohang, ba mo tshehile, ba mmitsa “lehlanya hweletsang, le hlaha, le sa rutehang le sa kenang sekolo, ‘hit, hain’t, tote, carry, fetch,’ jwalo-jwalo.” Ka tlwaelo ba ne ba mo ahlola ka thuto ya hae. Ba mo ahlola ka grama ya hae, ka mokgwa a aparang ka wona. O ne a ithatile ka letlalo la nku, le lebanta la lekoko la kamele, a le mohwete hohle. A kena metsing; ho se kereke, ho se setulo, ho se tshebedisano-mmoho; ba ne ba ke ke ba amohela seo; ba ne ba kgumamela modimo wa lefatshe. Lea bona?

¹⁰⁰ Jwale ha ke re ha ho baporofeta ba bohata ba tswang, jwalo ka Jambrese le Jannese. Empa kamoo o batlang ho sebetsa kateng, ke ho hlahloba molaetsa wa ho qala ka Lentswe, e be o e fumane; hore o mongwaheng ofe, le hore mongwaha oo o porofetetswe eng.

¹⁰¹ Jwale he seporofeto sa Johanne se ne se netefaditswe ka tsela ya Modimo ka Sebele. Shebang kamoo ho phethahetseng.

Bibele e boletse, "Lentswe la Morena le tla ho moporofeta." Mme Jesu e ne e le Lentswe. Mme Johanne o ne a porofeta ka ho tla ha Lentswe le tla tlatswa; mme Jesu, Lentswe, o tlide ho moporofeta, ka metsing. Oh, ho hotle jwang! Kamoo le sa hloleheng... Le a bona? Lentswe e ne e le leqeeme tsatsing leo. Ke mona ho tla moporofeta, a re, "Ke nna kodu ya Lentswe."

Ba re, "Re tshwanetse ho etsa'ng?"

¹⁰² Ho re, "Ha ke na le tokelo ya ho lokolla dieta tsa Hae. Empa ho na le Ya emeng hara lona, kae-kae, ke Yena Ya tla le kolobetsa ka Moya o Halalelang le ka Mollo. Seoloso sa Hae se letsohong la Hae, mme O tla fiela seotlo sa Hae ruri, mooko a o tjhese mollong o sa timeng, a bokelle koro modikong." Oh, ke moporofeta ya mokakang! Jesu o boletse ho ne ho se motho ya tswetsweng ke mosadi ya moholo jwalo ka yena, ho fihlela tsatsi leo. Oh, ho phatlola ho ho kakang! Kamoo a ne a tseba moo a emeng teng! O ne a tseba hantle. O ne a utlwile Modimo, mme e ne e dumellana le Lentswe hantle, ka baka le a sa tsotelle seo batho ba se buileng. A E rera mme a E porofeta, le hona. Mme le hlokomele, ha motho a emela see leng Nnete, eba Modimo o tlamehile ho netefatsa monna eo e le Nnete.

¹⁰³ Mohla Moshe a ne a theohela mono Egepeta, le ho re, "Ke ne ke le lefelleng kwana, mme ka bona sefatse se tuka, mme se sa tjhe. Ka nyolohela sefateng, mme, ha ke ya, keha Topallo e kgolo ya Mollo e lepeletse mono. Mme Lentswe la re, 'KE NTSE KE LE TENG.' Mme O mpoleletse ho nka lere lena le ho theohela mona le ho etsa mehlolo ena, mme Modimo o tla netefatsa Lentswe la Hae." A ottolla lere la hae, ha hlaha matsetse le dintsintsi, le lefifi le jwalo-jwalo. Mme ho netefatsa moporofeta eo, A boela a kgutlisetsa badumedi bao thabeng, mme Modimo a theoha ka yona Topallo eo ya Mollo, hantle hodima thaba eo, le ho paka hore hoo ho ne ho lokile.

Jwale shebang seo A se entseng tsatsing lena. Hantle.

¹⁰⁴ Jwale, Lentswe le tla ho moporofeta le mo netefaditse e le motho wa nnene, yena motho eo Mangolo a boletseng e tla ba yena. Ka potlako jwale. Empa, hape, Jesu o tlide ka sebopreho se fapaneng le tlhaloso ya bona ya maiketsetso ya seporofeto. Motho o ne a hlilositse seo e ne e tla ba sona. Ehlide. Mapresbeteriene a nahana e loketse ho ba bona. Shebang ha Modimo a etsa ntho, shebang ha mokgatlo ka mong o hlaha ka e nngwe. Eya, ho bile jwalo kamehla. Ba na le Jambrese le Jannese hohle. Lemohang, ba boletse karolo ya Lentswe. Empa, ho latela Lentswe la moporofeta, Letere e nngwe le e nngwe!

¹⁰⁵ Ba e fositse hape, jwalo ka tlwaelo, ba Mmitsa senohe, "letemonia; Belsebule," mme ba re O Ikentse Modimo, athe ba tshwanetse ba be ba tsebile, ka yona Bibele ya bona, hore E ne e le Modimo.

Lemohang, O ne a porofetilwe ke Esaia, Esaia 9:6, ho re, “Lebitso la Hae o tla bitswa Modimo O Matla, RaBosaFeleng.” Ho ke ke ha hlola ho ba le bontate ba bang ka morao ho moo, hobane E ne e le Ntate wa tshimolohong, ke Yena feela Ntate; ho re, “Le se ke la bitsa motho ofe feela wa lefatshe lena, ‘Ntate,’ leha e le mang, ka morao ho moo.” “Ke—ke Modimo O Matla, le RaBosaFeleng, Moeletsi, Kgosana ya Kgotsi.” Ehlide.

¹⁰⁶ Jwale, ba Mo entse sohle seo baporofeta ba badileng hore ba tla se etsa, jwalo feela ka ha ba etsa hona Mongwaheng ona wa Laodisea, ho Mo ntshetsa ka ntle ho kereke. “Sefofu, o feela, mme ha o tsebe.” Hantle seo moporofeta a se buileng, moporofeta wa Bibebe. Ho foufatwa ke meetlo ya batho, ba Mo ntshetsa ka ntle, Lentswe ka ntle ho dikereke tsa bona, jwalo ka tlwaelo, jwalo ka ha ho porofetilwe ka bona.

¹⁰⁷ Lemohang jwale, ka potlako jwale. Le se fose sena jwale. Ke wona mohlodithero, kamoo Jesu a Itsebisitseng barutuwa ba babedi bana hore E ne e le Messia wa bona! Jwale, mahlo wohle ka nq'ena. Le ka ntle naheng, le se fose sena jwale. Re lekile ho le bolella hobane Bibebe ke Lentswe la Modimo, e ngotswe ke Modimo ka BoYena, ka dipounama le tshebediso ya motho. Modimo a ka ngola, ka BoYena. Modimo a ka bua, ka BoYena. Modimo a ka etsa seo A se batlang, empa O kgethile motho ho e etsa hobane monna ya E ngotseng ke karolo ya Modimo. Kahoo, Modimo o ngotse Bibebe. Banna bao ba ne ba sa tsebe le seo ba se ngolang, kelellong ya bona ya botho. Ba ka nna ba se dumellane le Yona, empa ba E ngotse. Ba ne ba ke ke. Bibebe e itse, “Banna ba kgale, kamoo ba ne ba tsamaiswa ke Moya o Halalelang!” Modimo o ne o tsamaisa matsoho a bona, ho tsamaisa mahlo a bona diponong. Ba ke ke ba bua letho haese seo ba neng ba se shebile. Ba ke ke ba bua letho, hobane O ne a laola ka botlalo leleme, monwana, setho ka seng sa mmele se ne se tshwerwe ke Modimo ka botlalo. Ha ho makatse Bibebe e itse e ne e le medimo, e ne e le karolo ya Modimo! Yena E ne e le botlalo ba Modimo.

¹⁰⁸ Lemohang kamoo Jesu, Lentswe, a entseng hore barutuwa ba babedi bana ba hlomohileng ba tsebe hore E ne e le Messia wa bona, Messia, Lentswe le tshepisitsweng. Lemohang seo A se entseng, O ipileditse seporofetong. Le lemohe, “Dithoto, tse diehang ho dumela tsohle tse ngotsweng ke baporofeta.” Jwale, ha A ka a re, “Tjhe, eng, kereke e reng ka yona?”

¹⁰⁹ Ba Mo phetela pale. Ba ne ba tseba diketsahalo tsohle tse etsahetseng. Ba ne ba utwile bohloko ka hohle. Ba qala ba Mmolella, “A ke Wena feela moeti mona, kapa ha O tsebe se hlahileng Jerusalema?”

¹¹⁰ A re, “Dintho dife?” eka ha A tsebe. Lea bona, O etsa dintho tse ding ho bona feela seo o tla se etsa ka yona. Lea bona? Ho re, “Dintho dife? E ne e le mang? Ho etsahetse eng?”

¹¹¹ “Na O moeti feela?” Mme a ntse a bua hantle le Monna eo ba phetseng le yena dilemo tse tharo le halofo, mme a sa Mo tsebe.

“Dife? Ho etsahetse’ng?”

¹¹² “Tjhe,” ba re, “Jesu wa Nazaretha, e neng e le Moporofeta. Ha ho pelaelo kelellong ya rona. O ne a le matla ka Lentswe le ka ketso pela batho bohle. Re Mmone a etsa dintho tse Mo supileng e ne e le Moporofeta wa Modimo mongwaheng ona. Re tseba seo. Mme re ne re dumela hore E tla ba Molopolli, hore O tla lopolla Iseraele.”

¹¹³ Yaba O retoloha a re, “Dithoto ting, ba pelo di diehang ho dumela hore sohle seo baporofeta ba se buileng ka Yena se ne se ke ke sa etsahala?” Lea bona? Mo shebeng jwale ha a kgutlela seporofetong. Ke kgalemelo e kakang ho badumedi, ba ipolelang ba Mo dumela!

¹¹⁴ Lemohang kamoo A ileng a atamela sehloho ka teng. Ha A ka a tswa hantle le ho re, “Ke Nna Messia wa lona.” A ka be a e entse, hobane e ne e le Yena. Empa lemohang O Itshupile Lentsweng, ba ne ba ka tseba he. Hola A e buile, O ne a ka bua seo mme ho ne ho ka nna ha se be jwalo; empa ha A tloha mme a qala a bua ka sohle seo baporofeta ba se buileng ka Yena, mme ba e bona, ba ne ba ka bolela ka bobona, ha e ne ele bana ba Modimo. Empa a hulela maikutlo a bona ho seo baporofeta ba se boletseng pele le hore ho shejwe eng nakong eo Messia, mongwaha wa Hae, o tla bonahatswa. Yena, jwalo ka Johanne, a dumella Lentswe, Bibele, ho tsebisa Molaetsa wa bona. Moporofeta ofe feela wa mnene a ka etsa hoo. Ha a ka a tswa le ho re, “Ke Yena. Ke...” Ha se moporofeta wa nnene wa Modimo. Lea bona? Empa A re, “Kgutlelang Mangolong.” Lea bona, ha A hlolwe ke mokgwa wa Hae wa ho e etsa. Lea bona?

A re, “Re tseba Moshe.”

¹¹⁵ A re, “Hola le ne le tsebile Moshe, le ne le tla Ntseba.” A re, “Moshe ongotse ka Nna.” Ho re, “Batlisang Lengolo, ho Wona le nahana le na le Bophelo bo sa Feleng, mme Lengolo ke lona le Mpakang. Eyang le shebe Lengolong mme le e bone.”

¹¹⁶ Ke mona ha A fetole mokgwa wa Hae wa ho e etsa, ha e so fetoh le ka mohla. A ke ke a fetoha, hobane Ke Modimo o sa fetoheng. Lea bona? Le lemohe hore O kgutletse ho barutuwa ba babedi bana, Kleopa le motswalle wa hae, tseleng e yang Emmause, le ho re, a ba qotsetsa Mangolo, ho re, “Hobaneng le le dithoto hakaale le sa dumele hore Lentswe ka leng leo baporofeta ba le ngotseng ka Messia le lokela ho phethwa?” Oh, ke letsatsi le le kakang!

¹¹⁷ Johanne o entse ntho e tshwanang. “Batlisang Mangolo, shebang morao, hore ho tla ba le ‘lentswe la ya howang felleng.’ Ke tswa kae?” Lea bona? Hoo, ho tshwanetse ho be ho ile ha ba hlakisetsa yona. Hantle!

¹¹⁸ Ho tshwanetse ho be ho e hlakisa kajeno, ntho eo re bonang Moya o Halalelang o e etsa. O kile a re, “Batlisisang Mangolo.” Mme re... O batla le rona re e etse kajeno.

¹¹⁹ Lemohang, A qala ka seporofeto sa Moshe, Bibele e boletse, “Yena, a qala ka Moshe, le baporofeta bohle,” empa A qala ka Moshe, “Moporofeta,” Moshe o itsalo, “Morena Modimo wa lona o tla hlaha hara lona batho, hara batho. Morena Modimo o tla hlahisa Moporofeta.”

¹²⁰ Jwale O itse, “Kleopase, wena le motswalle wa hao mona, na Moshe ha a bolela hore matsatsing ana Morena Modimo o tla hlahisa Moporofeta? Mme Monna enwa eo ba mo thakgisiseng, na O phethile tshwanelo eo? Jwale, Moshe o porofetile sena. Mme jwale le hlokile moporofeta ka makgolokgolo a dilemo, mme ke mona ho hlaha Monna enwa. Mme pulamadiboho ya Monna enwa e ne e le mang, le itseng?” Le a e tshwara? Le sohle seo baporofeta ba se buileng ka Yena, ka mongwaha wa Hae, A bua le bona. Ehlide ho ka be ho kgahlisitse ho Mo mamela. Le ne le sa tlo rata ho Mo utlwa? Ke ne ke tla rata ho Mo utlwa, ho Mo utlwa, seo A itseng baporofeta ba se buile ka Yena, empa A se ke a re ke Yena. A mpa a ba bontsha ka seprofeto feela. A re feela, “Moporofeta o itse hona ho tla etsahala.” Le a bona?”

¹²¹ Ha re khutleng metsotso e mmalwa, mme jwale re mamele Mantswe a qotsitsweng ke Yena. Shebang mona, Lentswe boLona le qotsa Lentswe la Hae. Lentswe ka boLona le qotsa Lentsoe la Hae. E seng ho ba bolella hore E ne e le seo, empa ho dumella Lentswe ho Ipuella, ba ntoo tseba hoba E ne e le Mang. Letere ya Lentswe, e qotsa Lentswe le... Lentswe ka nama, Lentswe ka nama le qotsa Lentswe la letere, le bonahatswa le Yena ka botlalo. Shebang mona, ha re Mo mameleng ha A qotsa. Kamoo... Jwale, rea tseba bohle ba ne ba hlahilwe leseding ka tse sa tswa hlaha, ke hore, ka thakgiso le ka pale ya tsoho, lebitla, jwalo ka ha re sa tswa bala. Jwale O toba hantle Lentswe la seporofeto se buang ka Yena. Jwale ha re nahaneng feela hore O buile tjena; O boletse tse ngata haholo ho feta mona, empa hlokomelang.

¹²² Ha re reng Yena... re Mo utlwa a re, “Phetlang ho Zakaria 11:12. Na Messia o ne a sa tlo rekiswa, ho latela moporofeta, ka dikotwana tsa silifera tse mashome a mararo? Le sa tswa re Monna enwa o rekitswa ka dikotwana tse mashome a mararo tsa silifera. Phetlang ho...” Na le fumana Mangolo ao? Zakaria 11:12. Mme yaba O re, “Na le hlokometse seo Davida a se boletseng Dipesalemeng, Pesalema 41:9? O na a ekwe ke metswalle ya Hae. Mme hape ho Zakaria 13:7, O na a lahlwe ke barutuwa ba Hae. Mme ho Dipesalema 35:11, a qoswa ke dipaki tsa bohata. Le sa tswa Mmolela a entswe jwalo. Esaia 53:7, O ne a le semumu pela baqosi ba Hae. Esaia 50:6, ba Mo otla, moporofeta o boletse. Pesalema 22, O ne a tla lla sefapanong,

'Modimo wa Ka, Modimo wa Ka, O Ntahletseng?' Na O entse hoo, maoba thapama? Pesalema 22 hape, 18, ba arolelane dikobo tsa Hae. Na ba ho entse? Le Pesalema 22:7 ho ya ho 8, a songwa ke dira tsa Hae, kereke. Pesalema 22 hape, ha ho lesapo le robilweng mmeleleng wa Hae, empa 'ba hlabilo matsoho a Ka le maoto a Ka,'” A rialo. A ntse a pepile matsoho a Hae ka mora Hae, ntle le pelaelo, nakong eo. “Esaia 53:12 o itse O tla shwa pakeng tsa disenyi. Esaia 53:9 e itse O patilwe le morui. Pesalema 16:10 e itse, 'Nke ke ka lesa moyo wa Hae diheleng, Nke ke ka tlohela Mokgethwa wa Ka hore a bone ho bola.' Mme na Malakia 3 e ne e se moetellipele wa Monna enwa?" Oh, nka be ke ratile ho Mo utlwa a qotsa seo. Shebang diporofeto! Lemohang, e ntoo ba ka dipapiso tsohle tseo mohlomong a haotseng ho tsona, ka Isaaka, ho Genese 22, kamoo Modimo a bapisitseng Isaaka, kamoo ntate Abraham a nkileng mora wa hae ka sebele, a jere patsi ho hlwa leralla, le ho nehela mora wa hae ka sebele.

¹²³ Jwale e ne e qala e thophothela ho bona. A se a ba boleletse hobane ke dithoto ka ho se shebe seporofeto sa tsatsi leo. Mme jwale ya qala ya thophothela, ho qala ho bona bottlalo ba sohle sena se etsahetseng matsatsing a mmalwa a fetileng, dilemeng tse pedi kapa tse tharo tse fetileng, seporofeto se netefaditsweng sa mongwaha. Ya eba hona ba tsebang hobane motswalle wa bona ya thakgisitsweng, Jesu, o ne a phethile Lentswe ka leng la sena. Oh, ya eba hona ba tsebang hobane hore Monna eo ruri e ne e le Messia, hore—hore O tlamehile ho tsoha bafung. “Lebitla ha lea kgona ho Mo tshwara. 'Nke ke tlohela Mokgethwa wa Ka ho bona ho bola.' Ha ho Lentswe le le leng la seporofeto le ka hlolehang le ka mohla. Mme ehlide O tsohile.”

¹²⁴ “E tla ba baromuwa bao tlase lebitleng hoseng hona ba ne ba nepile. O tsohile bafung. O a phela. Ke Yena Messia eo.” Hobaneng? Le se ke la sitwa ke yona. “Diketso tsa Hae, tshebeletso ya Hae le ntho yohle A e entseng e supilwe hantle e le Mantswa ao moporofeta a itseng se tla etsahala bakeng sa letsatsi lena. Ke pheto.” Yaba moo ba tsebang hore e ne e le Yena, motswalle wa bona ya thakgisitsweng, Jesu, ya entseng hoo. Ha ho makatse ha dipelo tsa bona di ne di tjhesa ka ho bona ha A ntse a buisana le bona. Jwale ba ne ba tsamaile diamele tse tsheletseng, mme ya ka ke nako e kgutshwane.

¹²⁵ Mme ntho e nngwe eo ba e entseng ke ena, le a tseba, ba ne ba utlwile theru ya hora tse tsheletseng tsa seprofeto se netefatwang. Ke sona seo A buileng le bona ka sona tseleng. Hang feela ha ba theoha ka tsela, A hlaha, hoba O ne a le mono Jerusalema hantle. Dihora tse tsheletseng ka morao... hamorao, distadia tse mashome a tsheletseng, ba tsamaya tlase tseleng dimaele tse tsheletseng ho ya Emmause. Ke yona. Mme O ne a rerile, ho thasisetsa seporofeto ka dihora tse tsheletseng.

Le se ke la nkahlola ka tsa ka tse tharo, ke hona, le a bona. Lea bona? Empa lemohang, ba ne ba rerile... Yena... Ba ne ba utlwile theroy dihora tse tsheletseng ya seporofeto se thatisetswang, se netefatswang.

¹²⁶ Jwale e ne e nanarela nako ya mantsiboya. Le a tseba, esale Yena maobane, kajeno, le ka ho sa feleng. Yaba hona A tutubollang mahlo a bona ho tseba hore Baheberu 13:8, esale Yena maobane, kajeno, le ka ho sa feleng. Ka nako ya mantsiboya, diketsahalo di hlakiswa ke seporofeto. Se etsahalang horeng ya mehla ya jwale se ka suptjwa habonolo hola le ka dumela seporofeto sa hora.

¹²⁷ "E, dithoto, tse diehang ho utlwisia, tse diehang ho dumela (ha le phetse ho ipotsa ka yona), ho dumela tsohle tse boletsweng ke baporofeta ka Messiah, e ne e sa tlameha ho etsahala na?" Jwale O ile a boela a hlahloba dintlha tsena tsohle le ho bontsha seo moporofeta a itseng se tla etsahala. Yaba ba qala ba utlwisia. Ka baka leo A re... ho etsa eka O tla feta. Ba ne ba rata Monna enwa. Ba re, "Wena, O re file ho hong. Re ne re sa nahana jwalo. O a phela kae-kae." Ba ne ba bua le Yena, ba sa tsebe. Kahoo A... mme ntle le pelaelo A ba sheba ka hlomoho, mme A qalella ho feta, empa O—O ne a lebeletse bona ho Mo mema. Ke sona seo A se emetseng bosiung bona, hore o Mo meme.

¹²⁸ Lemohang, ha barutuwa bao ba Mo memela kopanong ya bona tafoleng, ke hona ha A ne a etsa ntho e tshwanang le eo A e entseng pele ho thakgiso ya Hae, mme mahlo a bona a tutuboloha. Ba ne ba tseba semelo sa Hae, mokgwa wa Hae. Ba tseba seo A se entseng, mme A se etsa nakong eo jwalo ka ha A se entse pele. Mme ba re, "Ke Yena eo!" Mme ba ema ka potlako ho e hweletsa, mme A nyamela. Mme moo ba nkileng dihora tse tsheletseng ho mamela theroy ena, mohlomong metsotsong e mashome a mabedi ba ne ba le maoto a bobebé ho kgutla ho bolella ba bang, "O tsohile ka nnete. Ruri O a phela."

¹²⁹ Metswalle, ena ke phethahatso ya Malakia 4, Mohalaledi Luka 17, Mohalaledi Johanne 15, oh, di ngata, Ditshenolo 10, diporofeto tse ngata tse ka hatisetswang tsatsing lena. Mme hape Bukeng ya Mareka le Mattheu, moo A itseng dipontsho tse kgolo tsena le mehlolo di hlaha lehodimong, mme batho ba di bitse dipirinki, dipirinki tse fofang, di ka—di ka nyamela ka matla le ka potlako ya monahano, bohlale bo ka kenang. A ka ngola, A ka bua, A etsa seo A se batlang. Topallo e kgolo ya Mollo, "yena maobane, kajeno, le ka ho sa feleng." Le diponahalo tse hlaha hodima lefatshe, dipiramite tsa mosi di phahamela moyeng, hodimo moo ho ke keng ha ba le mongobo kapa letho, dimaele tse mashome a mararo ka bophahamo. E lepilwe selemo le halofo pele e etsahala, hore e tla ba ka tsela eo. Sothang setshwantsho le bone hore ke Mang ya shebileng fatshe. Ha ho Lentswe le le leng le hlolehileng le kileng la

bolelwa, mme ke lena Lentswe la Modimo le ngotsweng, ho tiisa hore ke Nnete. Mme ke nako ya mantsiboya hape. Kea ipotsa hore O tla kgutla, ka mohau, bosiung bona le ho etsa ho hong jwale jwalo ka ha A entse morao mono. Ha re rape leng mme re Mo kope. Diketsahalo tse hlakiswang ke seporofeto se netefaditsweng.

¹³⁰ Modimo ya Matlaohle, re thused. Re thused, Modimo o ratehang, ho utlwisia, ho utlwisia dintho tseo re lokelang ho di tseba, ho utlwisia Lentswe la Hao. Mme jwale, Morena, re utlwile dithero jwale dilemo tse ka bang dikete tse pedi, ho ngolwa ha dibuka. Mme mehleng ena ke ena e nyenyelepile e kgutlike hape, mme jwale ke ho ella nako ya mantsiboya. Mamethodise, Mabaptise, Mapresbeteriene, le ba bangata ba bona ho theosa le mongwaha ba buile le Wena, mme mohlolomong tseleng ya letsatsi le leholo lena le sa kang la ba bosiu kapa motshehare, jwalo ka ha moporofeta a boletse, empa Lesedi le tla ba teng nakong ya mantsiboya. Jesu o tsohile lebitleng le ho hlaha ho Simone le ho basadi, le ho ba bontsha hore O a phela. Moo e ne e le hoseng. Mme yaba O boela a kgutla mantsiboya. Empa O ile a tsamaela ho bona motshehare, a ba kgalemella bofou ba bona, empa yaba O Itsebisa bona nakong ya mantsiboya.

¹³¹ Modimo, kena kopanong ya rona bosiung bona eo re nang le yona Lentsweng. Modimo, e dumelwa ka thata hakakang hara batho kajeno, empa ke leboha ha ho ena le bao O ba bitsitseng le ho ba kgethela Bophelong bo sa Feleng, mme O itse, "Bohle bao Ntate a Nneileng bona ba tla tla." Mme jwale ere Masedi a mantsiboya a sa tjhabile, O sa ntse o dumetse, Morena, hore ho se be le seporofeto se le seng (ho tse makgolo tse tswileng) se kileng sa hloleha le ka mohla. Jwale ruri ha seo se tsebisa, e loketse ho ba Wena, hobane ha ho motho ya ka nepang jwalo. Jwalo ka Bibele feela, ha ho motho ya neng a ka ngola, ha ho le motho nakong ya dilemo tse sekete le makgolo a tsheletseng, ka bangaodi ba fapaneng ba mashome a mane, ba ka ngolang, mme ho se le phoso e le nngwe ho Yona.

Modimo o ratehanng, ke rapela hore O tle o Iponahatse bosiung bona, ka Baheberu 13:8, hore esale Wena maobane, kajeno, le ka ho sa feleng. Le mesebetsi eo O e entseng mohlang oo, O a e etsa kajeno. Mme O e tshepisitse, O itse, "Mehleng ena ya qetelo, mohla lefatshe le duteng jwalo ka Sodoma le Gomora, kgopamiso." Re sheba bashanyana bana ba tshwanang le banana hakana, ba apara diaparo tse tshwanang le tsa bona, le—le ho bona banna ba leka ho itshwara jwalo ka bashanyana, le ho bona basadi le banna mongwaheng ona o kgopameng, ho bona kgohedi ya thobalano e fetohile e—e modingwana o kgumamelwang. Evangedi e qheletswe ka thoko, le bofeela bo kerekeng ya Laodisea. Oho Modimo, ke hora e kakang! Tloo, Morena Jesu, Itsebise rona. Hobane re e kopa ka Lebitso la Jesu.

¹³² Jwale le sa inamisitse dihloho tsa lona, mahlo a lona a kwetswe, ke tla le botsa ho hong. Le dumela hore Modimo o teng mona? Na le dumela hore dintho tseo E di etsang kajeno ke seporofeto se phethwang? Na le dumela hore Jesu Kreste ke yena maobane, kajeno, le ka ho sa feleng? Na le dumela hore O ne a le mona mme a bonahaditswe nameng tsatsing leo, le mesebetsi eo A e entseng mono, e ne e tla phetwa hape tsatsing lena? Moporofeta o itsalo. Bibebe e itsalo. Lengolo lohle le tshwanetse ho phethwa, le ke ke la hloleha. O Itsebahaditse jwang Yena? Ka hoba Moporofeta eo Moshe a buileng ka yena. A tseba diphiri tsa dipelo tsa batho. Mosadi a ama kobo ya Hae, A retoloha le ho re, "Tumelo ya hao e o pholositse." Mohla Simone Petrose a tla ho Yena, O tsebile lebitso la hae, a mmolella hore ke mang, hore ntatae ke mang. Mmeyena Jesu ya ratehang eo ha a shwa, O phela ka mehla le mehla. Ho roriswe Modimo! Mme kea dumela, nakong ena ya mantsiboya jwale, O re bitsitse hammoho hape.

¹³³ Oho Morena Jesu, tloo hara rona. Ose re fete. Tloo, hlola bosiu bohole le rona ho fihlela bosiu bona bo fetile, o ntoo re lesa ho tsamaya le wena hosane, re tle re O tsebe matleng atsoho ya Hao, ho re lerato le mohau le lereko la Hao di be le rona. Oho Modimo osa Feleng, fana ka dintho tsena. Rea tseba ho re ke Modimo feela ya fanang ka tsona.

¹³⁴ Ka mahlonoko a hora ena, ha re bueng sena. Modimo, Ntata rona nama ya rona ke motlotlwane o fokolang bakeng sa Hao. Empa, Morena, a mohau wa Hao o hlwekisang, Moya wa Hao o Halalelang, o tle jwale. Re hlatswe pelaelong ka nngwe le pherekano ka nngwe, qea-qeo ka nngwe le lekgonono ka leng le ka bang ho rona, ho re re lokolohe re se na le pelaelo e le nngwe; re tswe, re ipolele ka sebete jwalo ka Petrose, "O Kreste, yena maobane, kajeno, le ka ho sa feleng."

¹³⁵ Rea dumela hore Lentswe la Hao ke Nnete, Morena. Re bontshe feela, pele re qala mola ona wa thapelo, Morena, Itsebise rona. Jwalo ka ha O boletse, "Jwalo ka mehleng ya Lota," mohla Abrahama, sehlopha seo se bitsitsweng se emetse mora wa tshepiso, Lota o ne a le tlase mono a utlwa Billy Graham le Oral Roberts ba sejwale-jwale motheong oo wa diphutheho tse mabitso tlase mono, jwalo ka setjhaba. Empa Abrahama e ne e le mojaki ya se nang mokgatlo, sehlotshwana sena feela se phailang naheng eo a neng a tla e ja lefa. "Mme ba bonolo ba tla ja lefa la lefatshe." Katsatsi le leng, tlasa sefate sa moriti, ba sa ntse ba dutse, ba phomotse, Modimo a theoha ka sebopeho sa Monna. Mangeloi a mabedi a theohela Sodoma. Mme Modimo, nameng ya motho, a paka hore ke yena, A re, "Abrahama, o kae mosadi wa hao, Sarah?" Matsatsi a mmalwa pele ho mono, monna e ne e le Abrame; le S-a-r-r-a, Sarra; e seng Sarah, "kgosatsana." Mme Wa mmitса ka lebitso la kgosatsana, moradi wa morena. Wa bitsa Abrahama ka lebitso la hae, Abrahama, ntata ditjhaba. Mme Wa re, "Ke tla o etela."

¹³⁶ Modimo, kamoo pelo ya moporofeta eo e tshwanetseng e be e ile ya tlola! O tsebile hore O ne o le Mang ka nako yona eo. Ha ho makatse a ile a hlatswa maoto a Hao, a ntsha dijo tsohle tseo a na a ena le tsona, tse molemo ho feta, a di bea ka pela Hao. O ne a tseba hore ke Modimo eo. Yaba O re, “O kae Sarah?” eka O ne a sa tsebe. Mme Wa....

¹³⁷ Abrahama a re ho Yena, “O teng...mosadi o ka tenteng, ka mora Hao.”

¹³⁸ Mme Wa bolela se tla etsahala. Mme mosadi, pelong ya hae, a E belaela. Mme yaba O—O re ho Abrahama, “Hobaneng Sarah a belaetse hoo, a re pelong ya hae, ‘Dintho tsena di ke ke tsa ba jwalo’? Na ho na le ntho e ka sitang Modimo?”

¹³⁹ Oho Modimo! Jesu, Modimo ya bonahaditsweng wa Lentswe, O itse, “Jwalo ka mehleng ya Sodoma,” lefatshe le ne le tla ba maemong ao pejana feela ho timeletso ya lefatshe la Baditjhaba, lekgathe la Baditjhaba. Ke rona bana, Basodoma ho fihla setsing! Mme yaba O bolela hore Mora motho, eo kamehla e lebiswang ho “moporofeta,” o tla senolwa horen eo. Phetha Mantswa a Hao, Oho Modimo. Rona, bana ba Hao ba dumelang, re lebeletse ka dipelo tse tshepehang, ho re fa tumelo, Morena, hore, ha re tshwarana le mola wa thapelo, batho ba dumele. Ke nako ya mantsiboya, Ntate. Masedi a mantsiboya a Mora wa Modimo (Ya Neng a le teng, le Ya Leng teng, le Ya Tlang) a Iponahatse ka seporofeto seo A se entseng. Ka Lebitso la Jesu. Amen.

¹⁴⁰ Jwale ke itokiseditse ho—ho rapella bakudi. Empa ke ntho e makatsang, kamoo ha re ema mona. Ke nna enwa ke eme mona jwale ke isa phephetso setjhabeng, le ba hoketsweng naha ka bophara, hore Modimo e sa le Modimo. A ke ke a hloleha. Mme seo A se tshepisang, seo O tla se etsa. A ke ke a hloleha ho se etsa, hoba O tshepisitse ho se etsa. Ka baka leo nka beha tshepo e kgolo ho seo A se buileng. Ka baka leo ke shebeletse ho Tla ha Hae, ke Mo shebeletse ho hlaha nako efe feela, hobane O itse, “Ka hora eo le sa nahananang,” lefatshe le sa e nahananang, “ke moo A tla hlaha.”

¹⁴¹ Jwale, ho ya kamoo ke tsebang...ke tabernakeleng ya ka mona, mme ho na le batho ba mmalwa ba dutseng mona bao ke—ke ba tsebang. Moena Wright, ba mmalwa ba bang ba dutseng mona, hantle hona mona, ke a ba tseba. Empa ho na le bongata ba lona boo ke sa bo tsebeng. Mme ha ke na tsela ya ho re Modimo o tla etsa hona bosius bona. Re Mmone a e etsa dilemo le dilemo tse fetileng, empa A ka nna a se e etse bosius bona. Ha ke tsebe. Ho ho Yena. O ikemetse. O etsa seo A ratang ho se etsa. Ha ho motho ya ka Mmolellang hore A etse’ng. O dula a nnotshi, thatong ya Hae le ditseleng tsa Hae. Empa kahobane A e tshepisitse, ke Mo kopa ho E etsa. E seng bakeng sa rona, hoba re e hloka, empa mohlomong molemo wa baeti,

hore Moya o Halalelang o tlotswe . . . o ntseng o re tlotsa jwale. Jwale, ho sa natse O ntlotsa hakakang, O loketse ho le tlotsa, le lona, ehlile, ho dumela.

¹⁴² Jwale ke batla ho tshwara mola wa thapelo, mme ke batla ho rapella bakudi haholo kamoo nka kgonang. Jwale, re ka tshwara mola, ho bitsa batho le ho ba nyollela kwano, mola wa thapelo le ho rapella motho ka mong mona ya kulang, kea kgolwa, ho kopa baena ba ka ba baruti ho ba le rona mona, le ho le bea matsoho. Ehlile re ka etsa hoo. Kapa re ka kopa Ntat'a rona, E leng Yena feela ya ka le etsetsang ntho efe feela, hoba matsoho a ka ke motho jwalo ka lona banna. Empa ntho ke ena, hase letsoho la motho le etsang hoo; ke Lentswe la Modimo. Tumelo Lentsweng leo ke yona e etsang hoo. Ha ho ntho ya mahlale ka yona, ha ho mahlale ho yona ho hang.

¹⁴³ Ha ho ntho le e nngwe eo Mokreste a nang le yona dihlomong tsa hae e leng ya mahlale. Na le ne le tseba seo? Lerato, thabo, kgotso, tiisetso, molemo, bonolo, moso, mamello, tumelo, Moya o Halalelang, ntho e nngwe le e nngwe ha e bonwe ka mahlale. Mme ke yona feela ntho e leng ya nnete le e sa senyeheng. Ntho e nngwe le e nngwe eo o e shebang e tswa mobung mme e kgutlela mobung. Empa dintho tseo o sa di boneng ka leihlo la hao, empa o E bona e Ipepesa, leo ke lefatshe la bosaFeleng.

¹⁴⁴ Na le ka dumela, ha Modimo a ka Iponahatsa le ho bontsha A le teng mona a phela, ho etsa tsona dintho tseo A di entseng tshimolohong, ka mora Molaetsa ona, na le tla amohela e le phodiso ya lona? Modimo a ke a fane ka yona. Jwale ke kopa motho ofe feela ka tlung, ho sa tsottelehe o mang le moo o tswang teng, ke o kopa ho dumela Molaetsa ona ka tshabo hore ke Nneta. Ke Molaetsa oo Modimo a o beileng Bibeleng ya Hae bakeng sa hora ena, hore Jesu Kreste o mona bosiusing bona mme o a phela. Jwale e tla ba . . .

¹⁴⁵ Lona batho bohole lea ntseba, ke mona motseng moo ke holetseng teng. Ha ke na le thuto ya sekolo sa grama. Ke nnete hantle eo. Mme le ntsebile nako e telele ho lekana, kea tshepa ke phetse ka pela lona ho le bontsha hore kea tshephaha ke na le nnete. Ha ke moikaketsi. Esita le baseholli ba ka ha ba rialo. Bona, ba mpa ba re, "O—ha o moikaketsi, o mpa o le phoso feela. O mpa o le phoso o sa tsebe, e sang ka boomo." Ha ke hopole ke le phoso ka ho se tsebe, hobane Lentswe la Modimo le paka ka Molaetsa wa ka, mme Le tlamehile ho le bolella hore Ke Mang. Mme le nkutlwaa ka ho hlaka ha ke re Hoo hase nna, ka hona E loketse e be e le Yena. Na ho jwalo? E bang le tumelo ho Modimo ke hona. Shebang ka nqa ena, mme le dumele Modimo. Ha le ka dumela Modimo, Modimo o tla le fa. Ha A ka etsa jwalo ka ha A kile a etsa, e tla ba E sa le Modimo. Le dumela hoo?

¹⁴⁶ Le a e dumela? Mofumahadi ya dutseng ka pela ka mona, a ntjhebile, dikeledi di kolla mahlong a hae, ka boineelo. Ha ke mo tsebe ke mang, ha ke eso ka ke mmona. Ke motho o sele ho nna. Na o nahana Modimo o tseba sephiri sa pelo ya hao, ditakatso tsa hao, kapa sebe sa hao, kapa seo e leng sona? O nahana O a tseba? O nahana A nka ntshenolela sebe sa hao, seo o se entseng, seo o ne o sa tshwanelo ho se etsa, kapa takatso ya hao, seo e ka bang sona? Ha A ka etsa hoo, na ho tla etsa o Mo dumele, ho tseba hobane e tlamehile ho ba Yena? Na o tla e amohela e le Yena? Hase sebe sa hao se o hlophang; o se o se boletse. Empa o batla kolobetso ya Moya wa hae o Halalelang. O tla O amohela. Ke O bone o theoha o feta pela hae.

¹⁴⁷ Hore le tle le tsebe hobane ke ne ke shebile mosadi, o ne a ntjhebile, ke batla ho le bontsha Moya o Halalelang. Shebang mona, hantle hodima mosadi e monyenyanne enwa ya dutseng mona, hantle tlasa maoto a ka mona. Eitse ha ke rialo, ke yona ntho eo a e batlang, ke kolobetso ya Moya o Halalelang. O a dumela o tla O fumana, kgaitsedi? Phahamisa letsoho la hao, he. Ha ke eso bone mosadi eo bophelong ba ka, ka tsebo ya ka.

¹⁴⁸ Bonang monna enwa ya dutseng mona a inamisitse hloho ya hae, o dutse hona mono, kholloro ya hae ha e mo lekane, le jwalo-jwalo. O tshwerwe ke lefu la senya. O a dumela Modimo o tla o fodisa? Phahamisa letsoho la hao ha o fela o tla E amohela. Ho lokile, Modimo a fane ka kopo ya hao.

¹⁴⁹ Mohlanka enwa dutseng mona hantle, ya batlang kolobetso ya Moya o Halalelang. O a dumela Modimo o tla o fa Wona; monghadi, ka tae ya hao e tshweu e lepeletseng morao? Modimo o tla fana ka seo.

¹⁵⁰ Monna enwa mona o rapella mosadi wa hae. O kokelong ya batho ba kulang. O a dumela Modimo o tla mo phekola, le ho mo fodisa? O a e dumela? O ka e fumana.

¹⁵¹ Ka letsoho la hao mmetsong wa hao, o a dumela Modimo a ka fodisa maemo ao a pelo a o hlophang, bothata boo ba mala bo o tshwereng? O dutse mono, o a opelwa hona jwale. Ho jwalo na? O a dumela hore O a o fodisa? Jwale he o ka e fumana. Amen.

¹⁵² Le a bona esale Yena maobane, kajeno, le ka ho sa feleng. Le botse batho bao, bonang hore ke a ba tseba na. Ha ke ba tsebe, empa O a ba tseba. Amen. Le bona Lesedi leo le pela lebota mane, le lepeletseng hodima monna ya dutseng mono. O hloptjhwa ke maemo a masapo mokokotlong wa hae. Ha a tswe mona, o tswa Georgia. Mongh. Duncan, dumela ka pelo yohle ya hao, Modimo o tla fodisa bothata boo ba mokokotlo. O dumela ka pelo yohle ya hao? Modimo a o hlohonolofatse.

¹⁵³ Monna ke enwa o dutse morao mona, ka bothata ba mokokotlo, a ntjhebile. Ha ke mo tsebe, empa ke Mongh. Thompson. O a dumela? Ema, monghadi, morao mono, e le

hore . . . Ke molata ho wena. Ke hantle. Empa o dutse mono, o a rapela. Bothata ba mokokotlo wa hao bo fodile jwale. Jesu Kreste o a o fodisa.

¹⁵⁴ “Lesedi le tla ba teng ha e se e le mantsiboya.” Ha le bone na, O mona bosiung bona! Ke KE TENG e moholo. Esale Yena maobane, kajeno, le ka ho sa feleng. Le a e dumela? Na le kgotsofetse le kgotswe hore enwa ke Jesu Kreste ya Itsebahatsang, ho Itshupa ka seporofeto?

¹⁵⁵ O se tshwenyehe ka leihlo. Modimo o fodisa bakudi le ba hlokofetseng.

¹⁵⁶ Ke batho ba bakae ba . . . Ba bakae ka mona, ba kulang? Ha re boneng matsoho a lona. E bonahala e le kgulo e kgolo le kgatello. Ho na le motho ya nang le setlankana sa thapelo ho lona? Ha ke tsebe ke tla le fetisetsa jwang mona. Ke batla ho le rapella, mme ha ke tsebe mokgwa ho etsa hoo. Le a bona lebaka, shebang maboteng, ke tla kgona jwang ho ba kenya mono? Ha o ka pitlahanya aesele teng? Ke moo o thibang e nngwe hona mono, motho e mong le e mong o eme tsi.

¹⁵⁷ Mamelang, nkutlweng. Na nkile ka le bolella taba ka Lebitso la Morena e sa ka ya etsahala? Na ke nnete? Ntho yohle esale e lokile. Ha ke eso le kope peni e le nngwe ya tjhelete bophelong ba ka, ha ke re? Le ka mohla. Ha ke eso phuthe monehelo bophelong ba ka. Ha ke mona ka tjhelete. Ha ke mona ho le thetsa. Ke mona ho bonahatsa Lentswe la Modimo la hora. Ke le boleletse Nnete, mme Modimo o pakile hore ke Nnete. Jwale kea le bolella, HO RIALO MANGOLO, hore ha modumedi a beha matsoho hodima ya kulang, Jesu o itse, “Ba tla fola!” Le dumela seo? Jwale he, ka pela Sefahleho sa Modimo, na ha le dumele A tla etsa hoo hona jwale?

¹⁵⁸ Jwale beanang matsoho hodimo, mme o le bee mono motsotso feela. Jwale, o se ke—o se ke wa rapela, beanang matsoho hodimo feela; ka ntle mono naheng. Mme nna, ka bona, ke ipea hodima disakatuku tsena. Jwale ke batla le shebe ho nna motsotso feela. Modimo o siile’ng e sa etswa? Shebang kamoo A, seo Lentswe leo re le badileng, diporofeto tseo re buileng ka tsona, hore Jesu o Itshupile ka diporofeto. Jwale shebang hora, le diveke tse tharo tsena tse fetileng moo re ileng ra hlomahanya hora eo re phelang ho yona. Shebang seo re se badileng, ho ka thweng ka baporofeta ba bohata homme ka dipontsho tse ka thetsang mokgethwa. Kamoo Lentswe le bonahaditsweng, kamoo modimo wa mongwaha ona a foufaditseng leshan, dipelo tsa batho. Le kamoo Modimo ka boYena a boletseng ka diporofeto tsa Hae hore dintho tsena di tla etsahala Mongwaheng ona wa Laodisea. Ha ho letho le siilweng le sa etswa. Modimo o mona esale yena Modimo ya buileng le batho bao Emmause, ya Itshupileng ka diporofeto tse boletsweng ka Yena, O mona bosiung bona a

tsebahatsa Boteng ba Hae ka diporofeto tse boletsweng pele bakeng sa mongwaha ona. Esale Yena maobane, kajeno, le ka ho sa feleng. Le ka kgona ho e dumela? Jwale he beanang matsoho hodimo. O se ke wa ithapella, empa ka mokgwa wa hao ak'o rapelle motho eo o behileng matsoho a hao hodima hae, hobane le bona ba ntse ba le rapella. Jwale shebang, le se ke la belaela.

¹⁵⁹ Mme jwale ha le ka bona seo ke se shebileng! Mme lea tseba nke ke ka le bolella leshano, keeme mona. Ha le ka bona, mme tumelo ya lona e ka hohela Moya oo o Halalelang o moholo o neng o fofa kwana sebakeng—sebakeng, oo mahlale a katladitseng ditshwantsho tsa wona, le ho O bona o tsamaya ka hara mohaho ona ho leka feela ho fumana sebaka sa ho—ho dula, ho leka ho fumana sebaka sa ankora. Dumela Wona feela, moena wa ka. O e tsebahaditse ka Lengolo le tse jwalo, hore ke nnete. Jwale rapella motho eo o mmeileng matsoho ka botshepehi; le bona ba ntse ba le rapella.

¹⁶⁰ Jesu ya ratehang wa Nazaretha, hobane, re a utlwa, Morena, ka Lentswe, hore O teng mona, ka tshepiso hore O teng mona, “Moo ba babedi kapa ba bararo ba kopaneng ka Lebitso la Ka, ke teng moo hara bona. Mme mehlolo ena e tla tsamaya le ba dumelang; ha ba beha matsoho hodima ba kulang, ba tla fola.” Ka ntle kwana hodima maqhubu a fonofono ena, Moya o moholo o Halalelang o ke o kene phuthehong e nngwe le e nngwe. A Lesedi leo Halalelang oo re o shebileng mona hantle ka kerekeng, Le ke le tsholohelle hodima e mong le e mong, mme ba ke ba fodiswe nakong ena. Re kgalema sera, Diabolosi, ka pela Sefahleho sa Kreste; re re ho sera, hore se hlotswe ke—ke mahlomola a e mong, lefu la Morena Jesu le tsoho e hlolang ka letsatsi la boraro; le bopaki ba Hae bo lekilweng hore O teng mona hara rona bosius bona, a phela, ka mora dilemo tse sekete le makgolo a robong. Moya wa Modimo o phelang o ke o tlatse pelo e nngwe le e nngwe ka tumelo le matla, le molemo o fodisang ho tswa ho Jesu Kreste, Ya tsebahatswang jwale ke Lesedi le leholo lena le dikolohang ka kerekeng, ka pela Seffahleho sa Hae. Ka Lebitso la Jesu Kreste, fana ka sena bakeng sa tlotsi ya Modimo.

¹⁶¹ Disakatuku tsena tseo re di rapellang, di ke di ye ho bakudi le ba hlokofetseng etswe di reretswe bona. Moya o Halalelang o teng o leng teng mona jwale o Itshupang, o Itshupe holima mokudi e mong le e mong eo dintho tsena di bewang hodima hae. Boteng ba Modimo bo tlatse pelo tsa bona ka tumelo hoo lefu la mmele ya bona le tla fodiswa. Sena re se kopa, bakeng sa tlotsi ya Modimo, ka pela Sefahleho sa Jesu Kreste le ka Lebitso la Jesu Kreste, jwalo ka ha rona bahlanka ba Jesu Kreste re e kopa. Amen.

¹⁶² Jwale ho tswa dipeleng tsa lona, ha ke tsotelle se neng se le phoso ka wena, na o ka kgona, ho tswa pelong ya hao, ho

dumela ka pelo yohle ya hao hore Lentswe la Modimo le o abetse kopo ya hao? [Phutheho e re, "Amen." Mong.] Ke dumela hore letsoho ka leng, kamoo ke kgogneng ho bona, le phahame. Ha le e dumela, jwale hopolang, ho fedile.

¹⁶³ Lona ba ka ntle mono difofonong, ha le dumetse ka pelo yohle ya lona, jwalo ka ha bareri ba le bea matsoho, le baratuwa ba lona ba le beha matsoho, ha le dumela ka pelo tsohle tsa lona ho fedile, ho fedile. Moya o moholo o Halalelang, O ka hara tabernakele mona bosiung bona. Ke Mmone a tsamaya hodima batho, ho Ipontsha hodimo mona pela lebota, le ho tloha ho theohela hodima monna, ho theohela tlase mona le ho hodimo hara mohaho, ho tsebahatsa diphiri tsa dipelo, boitsebiso ba Boteng ba Hae, ho bontsha hobane esale Yena maobane, kajeno, le ka ho sa feleng. O mahareng a rona! Ke Modimo, Modimo o sa hloleheng le ka mohla.

¹⁶⁴ Mme na dipelo tsa rona di ne di sa tjhese, mme na ha di tjhese hona jwale, ho tseba hore re ka pela Sefahleho sa Jesu Kreste, ho Yena ebe tlotliso le thoriso kamehla le mehla; Yena e leng setshwantsho se hlakileng sa Jehova ya Matlawohle; Ya fofileng a theoha ka seboleho sa Topallo ya Mollo sehlahleng se tukang, ho hula maikutlo a moporofeta; Ya ileng a dula hodima thaba, mme mang le mang ya neng a e ama o ne a tla bolawa, ka ntle ho Moshe le Joshua. Kamoo A tsamaisitseng bana ba Iseraele felleng, leetong la bona, e le papiso ya batho ba bitswang kajeno. Ke Enwa, ka patlisiso ya mahlale, esita le ho Itshupa ka pela mahlale. Le ka diketso tsa Hae le ka seporofeto sa Hae, dintho tse porofetilweng ka Yena ho di etsa tsatsing lena, ho Mo etsa yena maobane, kajeno, le ka ho sa feleng, o netefaditswe ka ho phethahala. Na ha e a lekana ho hotetsa dipelo tsa rona ka hare ho rona? Modimo o le hlohonolofatse.

¹⁶⁵ Jwale ka pelo e le nngwe, ha re emeng re re: Jwale ke amohela Morena e le Mopholosi le Mofodisi. [Phutheho e re, "Jwale ke amohela Morena Jesu e le Mopholosi le Mofodisi."—Mong.] Mme ka mohau wa Hae, ["Mme ka mohau wa Hae,"] ho tloha horen ena ho ya pele, ["ho tloha horen ena ho ya pele,"] Oho Modimo, ["Oho Modimo,"] ho se be le ho se dumele, ["ho se be le ho se dumele,"] ho kenang pelo ya ka le ka mohla, ["ho kenang pelong ya ka le ka mohla,"] hobane ke bone ["hobane ke bone"] seporofeto ["seporofeto"] sa tsatsi lena ["sa tsatsi lena"] se phethahatswa. ["se phethahatswa."] Ke a dumela ["ke a dumela"] hore Jesu Kreste ["hore Jesu Kreste"] o a phela ["o a phela"] mme o mona jwale ["mme o mona jwale"] a thasisetsa Lentswe la Hae ["a thasisetsa Lentswe la Hae"] la hora ena ["la hora ena."] Diporofeto ["diporofeto"] tse ngodilweng ka Yena ["tse ngodilweng ka Yena"] jwale di phethilwe hara rona. ["jwale di phethilwe hara rona."] Ke

Mopholosi wa ka, [“Ke Mopholosi wa ka,”] Modimo wa ka, [“Modimo wa ka,”] Morena wa ka, [“Morena wa ka,”] Tsohle-ho-bohle ho nna. [“Tsohle-ho-bohle ho nna.”]

¹⁶⁶ Modimo o ratehang, utlwa bopaki ba rona. Mme o refe, letsatsi le letsatsi, Bohobe ba Bophelo. Mme re lebisa ho wena thoriso, oho Modimo, ho tswa boteng ba pelo tsa rona. Re a O rorisa, wena Ya Matlawohle, Modimo wa baporofeta. Ka Lebitso la Jesu Kreste. Amen.

Oh, ke motsotso o mokakang, ke nako e kakang!

. . . dumela feela;

Dumela feela, o mpe o dumele feela,
Tsohle di ka etswa, dumela feela.

Ha re ke re e bineng tjena.

Jwale kea dumela, oh, jwale kea dumela,
Tsohle di lokile, jwale kea dumela;
Jwale kea dumela, oh, jwale kea dumela,
Tsohle di ka etswa, jwale kea dumela.

Na ke bopaki ba lona boo? [Phutheho e re, “Amen.”—Mong.] jwale re sa inamisa dihloho tsa rona.

Ho fihlela re kopana!
Maotong a Jesu re kopana;
Ho fihlela re kopana!
Modimo a le baballe re boeles re kopane!

[Moena Branham o qala a binela *Modimo A Be Le Lona* ka marameng. A ntoo re ho Moena Neville, “Na o batla ho bua ho hong?”—Mong.] Vayle.

. . . maotong a Jesu;
Ho fihlela re kopana!
Modimo a le baballe re boeles re kopane!

¹⁶⁷ Ka dihloho tsa rona tse inamisitsweng, Moena Vayle o eme mona ho qhala ka thapelo. Moena Lee Vayle, ke mongodi mona tabernakeleng, wa dingolwa le dibuka, le dintho tse jwalo. Moena wa bohlokwa, o bile le nna matsholong a mangata. Eka nka be ke fumana monyetla ho dumella moreri e mong le e mong, ho nyolollela hodimo mona le ho qoqa le bona. Le a utlwisia, kea kgolwa. Moreri e mong le e mong, re thabetse ho ba le lona mona. Phutheho yohle, batho ba dikereke tse fapaneng, le eng hape, re thabetse ho ba le lona mona. Mme ruri ke thapelo ya rona ho e mong le e mong, “Modimo a le baballe re boeles re kopane.” Ka dihloho tsa rona tse inamisitsweng, le ka matsoho a rona a phahamisitsweng, ha re bineng e bineleng Modimo hamonate-nate.

Ho fihlela re kopana!
Maotong a Jesu re kopana;
Ho fihlela re kopana!
Modimo a le baballe re boeles re kopane!



DIKETSAHALO Di HLAKISWA KE SEPOROFETO SST65-0801E
(Events Made Clear By Prophecy)

Molaetsa wona o tlileng ka Moena William Marrion Branham, o rerilweng tshimolohong ka Senyesemane ka Sontaha mantsiboya, Phato 1, 1965, mane Tabernakeleng ya Branham, Jeffersonville, Indiana U.S.A., o ntshitswe mabanteng a kgatiso a makenete mme o ngotswe o sa kgutsufatswa ka Senyesemane. Phetolelo ena ya Sesotho sa Borwa e phatlaladitswe ka 2006 ke ba ha:

©2006 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org